

# DISCOVRS DES<sup>2</sup>

MALADIES EPIDI-  
MIQVES OV CONTA-  
GIEVSES ADVENVES EN CESTE  
ville de Paris, és années 1596. & 97. &  
és années 1606. & 607. Comme aussi  
en l'année 1619. fort vtile & necessaire  
au public pour se conseruer & preser-  
uer des susdites maladies.

*Ensemble vne loüange à Messieurs de la Police, sur  
l'establissement de la maison de la santé, en  
l'an 1606. Reueüe & augmentée en  
cette derniere impression.*

Par Maistre GVILLAVME POTEL, natif de  
Meaux, M. Barbier & Chirurgien  
Iuré à Paris.

*Virtutem fortuna non deprimet.*



A PARIS,

Par NICOLAS CALLEMONT, demeurant  
rue Quiquetonne. 1623.

*Avec Privilège & Permission du Roy.*





A TRES-HA VT, ET  
TRES-VERTVEVX SEI-  
GNEVR MESSIRE NICOLAS  
de Verdun, Cheualier, Conseiller  
du Roy en ses Conseils d'Estat, &  
premier President en sa Cour de  
Parlement de Paris.



ONSEIGNEVR,

*Il est vray ce que Plutar-  
que a dit au traicté d'Isis  
& d'Osiris, que les hommes sages ne peu-  
uent demander aux Dieux rien de meil-  
leur que ce qu'ils peuuent obtenir, & ce  
principalement la cognoissance d'iceux,  
d'autant qu'il est suffisant à l'homme*

*A ij*

pour son bien : Car il ne scauroit demander en sa priere don plus magnifique que de les cognoistre, & l'homme ayant l'intelligence d'iceux il recognoist que Dieu n'aime rien tant que la verité. C'est pourquoy entre toutes les graces qu'il possède, il s'est reserué celle-là pour soy-mesme, & les hommes sur toutes choses en toutes leurs actions doiuent imiter la diuinité, & par consequent estre veritables. Ayant donc (MONSEIGNEUR) eu vne ample & parfaite cognoissance de vos vertus, lesquelles non seulement sont esparses par les nations Estrangeres, mais spécialement en la nation Françoisse, & plus particuliere entre les Tholosins & Parisiens, lesquels ont veritablement recogneu la grandeur de vostre Esprit, la seuerité de vos Loix & Ordonnances, l'execution & obseruation d'icelles, le tout pour le bien & utilité publique, imitant ce grand Capi-

raine Grec Agesilaus, lequel ne parloit  
 iamais d'un lieu qu'avec le regret de ses a-  
 mis, & de ses ennemis qu'il auoit conquis,  
 disant qu'un excellēt & magnanime Chef  
 d'armée en vne necessité vrgente ne se doit  
 tousiours abstraire aux loix & rigueurs  
 des Ephors ny s'arrester en vn lieu: aussi les  
 Tholosins se sont fort affligez quand ils  
 ont entēdu la nouuelle de vostre partemēt,  
 & qu'ils ont esté priez de vostre presence,  
 comme au contraire les Parisiens s'en sont  
 infiniment esioüis pour l'esperance qu'ils  
 auoient de vous recevoir comme vn Soleil,  
 duquel ils sentiroient la vertu de ses rayons  
 ainsi que l'effect s'en est ensuiuy, non seule-  
 mēt pour rēdre à vn chacun particuliere-  
 mēt la Iustice selō l'équitē de sa cause, mais  
 generalemēt pour le ressentimēt du bien pu-  
 blic en quoy vous estes extrémēmēt recom-  
 mandable, nō pas seulemēt en ce Royaume,  
 mais aussi enuers les Estrangers pour leur

auoir arresté en leur pays les feneants & vagabonds, lesquels par ce moyen sont cōtraincts de demeurer en leur lieu natal, & sous la domination de leur Prince, empeschant par ceste ordonnance que les pays ne soient plus desormais despeuplez, & que la terre ne demeure infructueuse au grand dommage du public, & mauvais exemple de plusieurs petits enfans, qui par la negligence de leurs peres estoient nourris & esleuez en vne vie feneante, sans se soucier d'apprendre aucun mestier, assurez qu'ils estoient de trouuer tousiours de quoy viure dans Paris, ville autant remplie de pieté & de charité: cōme elle surpasse de grandeur & multitude de peuple les autres villes du monde.

C'est ce que disoit ce Lacedemonien à vn belistre qui luy demandoit l'aumosne, ie te la bailleray bien, dit-il, mais celuy qui te la donnée le premier ta fait tort: Car tu

neferas iamais d'autre mestier ; voulant dire que le trauail pour gagner sa vie est vne vertu, & que la mandicité est vn vice. Et vous (MONSEIGNEVR) ayant le iugement tres-solide & tres-équitable pour distinguer le vice de la vertu, n'aués pas eu seulement esgard au mal qui auoit pris racine, & qui regnoit parmy nous, ains aussi à celuy qui en pouuoit aduenir, Et auez suppléé au deffaut de vos Deuanciers, lesquels auoient obmis ceste loy en ceste ville de Paris, le miroir & l'exemplaire de toute celles du monde, si bien qu'on ne verra plus aucun mandier sa vie, & tout le monde s'estudiera à vostre occasion a la vertu. Ce n'est pastoutesfois que vous ayez aboly et deffendu la charité, ains au contraire l'auuez d'autant plus augmētée par l'establissement des maisons pieuses et hospitaux, lesquels vous rendent plus recōmandables: car le bel ordre que vous y auez estably

maintenant parmy nous a fait cognoistre à tout le peuple que les choses que l'on iuge bie souuent les plus impossibles peuvent estre renduës faciles par vne iudicieuse ordonnance. Mais comme il n'y a ordinairement que ceux qui sont employez au service du public qui puissent cognoistre les actiōs publiques il semble qu'il n'i ait personne qui puissent veoir plus clairement l'utilité de vostre charitable aduis que les Maistres Barbiers et Chirurgiēs de ceste ville de Paris, qui ont plus particulièrement que les autres desuoüé leur vie à l'utilité publique, par le service continuel et assidu qu'ils rendent iournellement à tous les hospitaux veoir et visiter les malades deux iours de la sepmaine au grand bureau. Et moi spécialement (MONSEIGNEUR) qui pour le secours des Parisiēs et par plusieurs années exposé ma vie auprès des malades de la contagion, comme és années 1596. et nonante sept



nonante sept, à l'Hostel Dieu de Paris,  
 & en l'année 1606. & 607. à la Maison  
 de la santé à S. Marcel, & la dernière  
 fois, l'année 1619. Ayant eu l'honneur d'e-  
 stre esleu par vous pour vacquer à la vi-  
 site de tous les malades de ceste ville &  
 faux-bourgs de Paris, & en l'année 1608,  
 au sortir de la Maison de la santé, ie pre-  
 sentay ce petit discours à un Achilles, &  
 maintenant j'ose l'offrir de rechef à un  
 Phœnix, puis que ces deux n'ont esté qu'un  
 en ce qui regarde le bien public. Et combien  
 (MONSEIGNEUR) que ce petit discours  
 ne soit pas digne de vostre excellance, j'o-  
 seray toutefois supplier vostre grandeur de  
 le vouloir prendre sous sa protection, Afin  
 que sous l'ombre de vos aïles il puisse pren-  
 dre son vol avec plus d'assurance, & estre  
 plus fauorablement receu par les Pari-  
 siens, comme ie ne fais point de doubte qu'il  
 sera, quand ils verront qu'il aura pour  
 Protecteur le pere du public, veu mesme

que chacun est obligé de vous rendre quelques graces particulieres, estant le premier mouuant qui dōnez la force & la vie aux inuentions de tout ce qui regarde les Hospitaux, & principalement ceux de nostre vacation, qui tous ensemble prient Dieu pour vostre contentement & prosperité, & moy en particulier qui vous supplie en toutes humilité de me tenir pour,

**MONSEIGNEVR,**

Vostre tres-humble & tres-obeïssant  
seruiteur, G V I L L A V M E P O T E L,  
Maistre Barbier & Chirurgien Iuré,  
à Paris.



A MONSIEUR LE  
Procureur General.

SONNET.

La vertu qui en vous, établit sa demeure,  
Charme si bien les cœurs des hommes d'icy bas  
Qu'ils se tiennent heureux de tomber en vos lacs,  
Et ne desirent après de fortune meilleures.

Cette fille du Ciel, qui vous chérit des l'heure,  
Qu'au monde fustes mis, accompagne vos pas,  
Et accompagnera jusqu'au soleil du trespas,  
Puis qu'il faut par destin que pour vivre on meure.

Mais avant que passer ce passage fatal,  
Vos ans soient à celui du bon Nestor égal,  
Vous qui pere des bons, estes fleau du vice,

L'ennemy des meschans, & leur Alcide fort,  
Qui au Conseil du Roy servez de grand support,  
Et de luy reconneu digne Chef de Justice.



A MONSIEUR LE  
Lieutenant Civil, & Preuost des  
Marchands de la ville  
de Paris.

S O N N E T.

**V**OUS qui estes chery de la chaste Themis,  
Et qui portez en main le faix de la Ballance,  
Dont le vent des faueurs n'esbranle la constance,  
Mais qui tousiours pareil assisteZ vos amis.  
Vous qui (Argus) veillez sur vn troupeau commis  
Et qui plus qu'un Atlas faites de resistance  
A porter un fardeau bien pesant en la France,  
Des charges ou dignement vous auez esté mis.  
Continuez tousiours ceste pieuse enuie,  
Pour gagner par la mort, vne immortelle vie,  
Qui fera vostre nom par l'Univers voller.  
Vous serez mis au rang des hommes Heroïques,  
Ayant tenu le frain des affaires publiques,  
Et vous pourrez à eux instement égaller.



A MESSIEURS LES  
Escheuins d'icelle ville  
de Paris.

ODE.

P ILOTES qui veillez sans cesse,  
Autour du Navire François,  
Et qui employez vostre adresse,  
Pour empescher qu'il ne renverse,  
Où ne se brise quelquefois.

C'est vous qu'à present ie reclame  
de continuer vostre soin,  
Et ne point encourir le blasme,  
De luy manquer de feu & flame,  
Pour l'esclairer à son besoin.

Mais ma temerité tres-grande  
S'eschappe trop impudemment,  
Car vostre venerable bande,  
De iour ou de nuict ne demande,  
Que procurer son sauvement.

Vous montrez tous de quel courage,  
Vous vous portez à ce deuoir,  
Et que pour gagner l'auantage  
Il ny a aucun Personnage,  
Qui ny employé son sçauoir.



*LOVANGE A MESSIEURS  
de la Police sur l'establissement de la  
maison de la santé en l'an 1606.*



ESSIEURS, à iuste  
raison *Gallien* a dit en la  
fin du poëme de son pre-  
mier liure des Aliments,  
que nul certainement ne

pouuoit deuenir patron de Nauire, ny  
ouurier d'aucun autre mestier par liure,  
ains que la seule doctrine acquise par  
experience fait les maistres & artisans.  
Ce qui est verifié par *Ouide* au liure de  
*Ponto Elegie 4.* disant que toutes cho-  
ses ne sont en tous, mais certaines  
choses en aucuns, & le mesme *Gal-  
lien* en sa Methode, dit que s'il se trou-  
ue vn homme ayant les deux choses, à

sçauoir science & experience, qui sont les deux fondemens de la Medecine & Chirurgie, il doit estre preferé à tous. Et *Hipocrates confirmant le tout en l' Aphorisme premier, du premier liure de son Aphorisme.* Quand il dit que la vie est courte, soudaine & briefue, mais l'art est long, l'occasion est soudaine & legerement passée ; l'experience est perilleuse & dangereuse, & le iugement difficile.

Il monstre bien par là qu'il est tres-dificile & presque impossible de trouuer vn homme qui soit parfait en tout ce qui dépend de son art, mais bien en quelques parties, & vn autre en quelque autre partie, & principalement en celle qui regarde le bien du public. C'est moy (MESSIEURS) qui suis demeuré seul à Paris, entre tous mes Compagnons de mon temps, qui ay choisi & fait eslection de ceste partie



de Chirurgie, la moins prisee & estimée des ignorans, la cognoissance & experience de laquelle est la plus necessaire enuers tous les hommes, selon la necessité qu'ils ont de respirer, & la plus charitable selon Dieu : d'autant qu'il n'y a fleau duquel ils ayent plus menassé son peuple que de la peste. C'est (MESSIEURS) de ceste tant espouuantable maladie que ie desire briefuement vous faire entēdre quelque experience que i'ay fait depuis vingt-sept ans ou enuiron, au milieu de plus de quinze à vingt mille pestiferez, laquelle experience seruira d'exemple & moyēs à ceux qui s'en voudront seruir & corriger sur la faute d'autrui, ensemble vous faire voir & sçauoir particulièrement à tous le peuple de Paris, le bien que vostre soin & prudence enuers le public, y a apporté & apportera de commodité a la

posterité. De façon (MESSIEURS) que deuez, ainsi que dit *Plutarque* au liure des vies, paralelles de plusieurs Grecs, & Romains, estre appelez pere du peuple pour auoir bien gouuerné & maintenu leurs Republiques en paix, & vous d'auoir trouué & donné l'invention de l'establissement de la Maison de la santé, par laquelle auez rendu la vie, apres Dieu, iusques au nombre d'un millier, & sauué les biens à plusieurs, s'il eut fallu qu'ils eussent esté alimentez & traictez en leurs maisons de la façon qu'ils ont esté en ladite Maison.

Car le bon ordre que vostre sagesse y a fait obseruer, fait cognoistre à tout le peuple, & principalement aux malades pour ny auoir manqué d'aucunes choses qu'ils leurs fust nécessaires pendant leurs maladies. Que le mauuais bruit qui courroit au com-

manquement parmy le peuple ou entre quelque enuieux du bien public estoit faux; De sorte que tout le monde vous doit vne loüange & bien veillance perpetuelle, au lieu d'une animosité pour leur auoir fait voire & monstrier par effect la chose dont ils auoient mauuaise opinion: Car non seulement ils ne croyoient point que les malades fussent traictez de la façon qu'ils ont esté & seront, & mesme que l'establissement d'eust estre perpetuel, comme il est, & sera avec le soin que Messieurs de la police y apporteront par leur bien-veillâce iournalliere enuers les pauvres malades. Chose à la verité qui est digne d'estre considerée, que tant d'honnestes gens se liberent de leurs affaires propres pour se charger de celles du public, duquel ils ne doiuent attendre aucune recompense, sinon de Dieu, le-

quel recognoist les hommes selon  
leurs merites.

Messieurs, afin que la perfection  
couronne l'œuvre, ie vous supplie  
au nom de la charité Chrestienne de  
m'excuser, si ie vous dis que ne de-  
uez receuoir aucuns Maistres Chirur-  
giens, ny Compagnons, pour estre  
admis à pincer & medicamenter les  
pauures malades de la peste, soit aux  
maisons publiques, ou par la ville, és  
maisons particulieres. Sinon de ceux  
qui desja en auront eu vne grande ex-  
perience pour y auoir suiuy, seruy &  
conduits par des Maistres experimen-  
tez qui en ont beaucoup veu ainsi que  
i'ay fait. Car i'ay seruy *Maistre Bois-  
sart, Hamelin, le Roy, la Forest, &  
Monsieur Marié*, desquels i'ay beau-  
coup appris (tous lesquels maistres  
ont rendu seruice au public, pour a-  
uoir pensé & medicamenté les ma-  
lades

lades de la contagion en ceste ville de Paris.) Autrement c'est plustost vn homicide que non pas vne charité. C'est ce que dict Monsieur Paré en son 22. liure de la peste, au chapitre adressant au Magistrat Politic, parlant du soin qu'il doit auoir quand ceste maladie est en regne, ou que par quelque presage on la iuge pouuoir aduenir. Que ceux qui sont sans experience de ce mal peuuent beaucoup commettre des fautes aux du detrimment public. Et pource (MESSIEURS) y prenant garde vous obligerez d'auantage le peuple à prier Dieu qu'il vueille conduire vos œuures à bonne fin, vous priant d'excuser ma temerité de vous vouloir adresser vne chose si peu elegante. Mais ie croy que vous considererez le vouloir que i'ay de m'acquitter du bien que ie desire au public, desirant par ce moyen es-

uiter la rigueur que Soló faisoit ex-  
 cuter à l'endroiçt des oyfifs & feneâts,  
 voire iusques à les condamner à mort,  
 & voyant que Dieu ayant appaisé son  
 ire en ceste année 1619. Et par ce  
 moyen i'ay esté liberé du grand  
 travail auprès des malades, i'ay pris  
 la hardiesse d'escrire ce que i'ay trouué  
 par experience depuis vingt-sept ans.  
 Je desire (MESSIEURS) avec vostre per-  
 mission de le faire entendre à tout le  
 peuple, & mesme luy faire voir com-  
 me il vous est obligé, priant Dieu  
 (MESSIEURS) qu'il conserue & main-  
 tienne vos bonnes intentions.

Vostre tres-humble & tres-obeïssant  
 seruiteur, G V I L L A V M E P O T E L,  
 Maistre Barbier & Chirurgien lu-  
 ré, à Paris.



## AMY LECTEUR.

**C**E grand Historiographe des gestes des Grecs & Romains, *Plutarque* parle de Certorius Capitaine Romain, qui fut enuoyé pour faire guerre contre les ennemis de leurs Republiques, & estant approché d'iceux, ses soldats voulurent courir sus promptement & à la vollée. Tout beau, dit-il, ce n'est pas ainsi qu'il faut batailler ny vaincre nostre ennemy, & surce leur voulant donner vne similitude. Il dit à l'un d'iceux, prens la queue de ce cheual tire & l'arrache, & cestui cy ayant bien tiré enfin la peine fut vaine, apres il dit à vn au-

tre tire & l'arrache poil à poil, celuy cy eust bien-toft fait ce que l'autre n'eust peu iamais faire, il leur vouloit mon-  
 strer que les choses ne sont pas ac-  
 quis tout à coup, ains avec le temps  
 & meure deliberation. C'est ce donc  
 ie te veux aduertir, que sortant de la  
 Maison de la santé, en l'an 1608 I'ay  
 mis ce petit liure en auant, & encore  
 en l'annee 1619. Je fus esleu pour vi-  
 siter, penser & medicamenter les ma-  
 lades de la contagion en ceste ville de  
 Paris, en la premiere impression du-  
 quel i'ay trouué quelque petite cho-  
 se de superflüë, & beaucoup de man-  
 que, eu esgard au subiect. Lesquelles  
 i'ay ostées, corrigées & adjoustées, au  
 mieux qu'il m'a esté possible, & selon  
 le peu de capacité que mon esprit à  
 peu permettre, aussi que ie n'escriis  
 pour les doctes, ny à ceux de ma vac-  
 cation: car il ce pourroit faire que



quelques enuieux du bien public au-  
roient telle chose à peu d'estime. C'est  
pourquoy ie l'adresse seulement au  
vulgaire & commun peuple, m'asseu-  
rant qu'il aura pour agreable, & dira  
avec moy que souuentefois vn petit  
aduertissement en vne necessité vrgé-  
tesert de beaucoup à vne republique;  
Et pour ce ie te prie d'accepter ce peu  
que i'ay acquis, non au pris de l'argent,  
ains avec trauail & danger : Priant  
Dieu qu'il nous garde du sujet d'en  
parler plus curieusement, Adieu.

C iij



## SONNET.

**V**oicy du *vray* Surgeon, que *Melampe* nous laisse,  
 Les experts monuments & les escrits disers,  
 Qui presente au François & à tout l'*Vniuers*  
 Contre ce mal diuin qui quelquefois nous presse.

Ne foule ce present puis qu'on t'en fait largesse,  
 (ô *Paris*) ne m'éprise ceux qui sont tant experts,  
 A debeller cét hydre, de ses monstres si fiers,  
 C'est *POTEL* qui trois fois, c'est offert d'allegresse.

Si au grand *Anchurus* l'on a dressé l'*Autel*,  
 Et le nom de *Marc Curse* est rendu *Immortel*,  
 Pour auoir deliuré leurs patries fameuses,

Je veux orner ton front de roses & de fleurs,  
 Pour compenser (*POTEL* tes infinis labours)  
 Et te mettre au mont double de *Phæbus* & des *Muses*,

R. VINAY.



# ADVERTISSEMENT AV PEUPLE DE PARIS, DE QUELQUES REMEDES & moyens pour se preserver de la maladie Contagieuse.



EV PLE Parisien, puis  
 qu'il a pleu à Dieu me  
 preserver de tomber au  
 Labyrinthe de mort,  
 auquel ie me suis trois  
 fois exposé pour vous. La premiere en  
 l'an mil cinq cens quatre-vingt seize,  
 & dix-sept, avec Maistre *Nicolas Boi-*  
*sard*, & Maistre *Vincent Hamelin*, en  
 qualité de seruiteur, tant és maisons  
 particulieres, que en l'Hostel Dieu  
 de Paris. Et la seconde fois en la Mai-

son de la santé, en l'an mil six cens six,  
 & sept, en qualité de Maistre, Et en-  
 cores en l'année mil six cens dix-neuf,  
 pource ie desire vous faire voir que  
 ie ne veux estre semblable à ce Thimō  
 Athenien qui estoit tant ennemy de  
 la société humaine, que ennuyé de  
 leur vie & de les voir, il se retira en vn  
 lieu à part, auquel il auoit fait dresser  
 vn nombre de gibets, & les voulant  
 faire abattre il s'achemina en la place  
 publique d'Athene, où il assembla  
 grande quantité de peuple, pensant  
 qu'il leurs d'eust faire quelque belle  
 harangue, sur le bruiet qu'il auoit d'e-  
 stre Philosophe, mais il leurs dist seu-  
 lement, entre vous Atheniens desespe-  
 rez & lassez de viure, si voulez vous  
 pandre hastez-vous: car ie veux faire  
 abbatre mes gibets. Ains au contrai-  
 re i'ay voulu plustost imiter ce grand  
 Cheualier Romain Marcus Curtius  
 qui

qui se voulut liberallement precipiter au gouffre pour secourir le reste de la Republique de ceste grande pestillence qui regnoit pour lors à Rome, à cause des vapeurs putrides & horribles, qui resultoient de ce puant abisme : Et ayant entendu par l'oracle que les sacrifices faits aux Dieux, ny les bagues precieuses, & meubles de grands prix que iournellement y jettoient les Dames Romaines, ne peurent estaindre l'horreur de cet abisme; & scachant qu'il ny auoit autre remede que par le sacrifice d'vne creature humaine, & de sang illustre qui volontairement prodigueroit sa vie pour le salut de sa patrie. Alors gayement habillé, & monté comme en vn iour de bataille, il prend congé de ses amis, & se va precipiter en se gouffrir; disant il n'est pas raison qu'un general perisse pour vn particulier, à

l'instant la gueulle espouuantable de  
 abisme fut close. Ce Sacrifice faict  
 pour le bien de la Republique, con-  
 firme le dire de *Phosion* aux Athe-  
 niens, leur disant, qu'il reputoit la mort  
 bien-heureuse, & perdre sa vie pour  
 sauuer celle de ses autres concitoyens,  
 ceste histoire est mise au rang des  
 prodiges, aussi la matiere de laquelle  
 j'entends vous traicter, qui est la pe-  
 ste, semble estre prodigieuse à plu-  
 sieurs, & miraculeuse à quelques-  
 vns. Ce n'est pas mon intention de  
 vous d'escrire toutes les especes des  
 causes particulieres & subalternes de  
 ceste maladie, mais en bien passant ie  
 parleray de quelques-vnes des plus  
 generalles & principales, & pour  
 monstrier qu'en la peste il y a quelque  
 chose de surnaturel, & de fait comme  
 Chrestiens nous le deuons croire. Que  
 la premiere cause de ceste maladie

vient de nos fautes, par lesquelles ayâ  
 offensé Dieu, il nous l'enuoye pour  
 le chastiment d'icelles, la seconde  
 cause est l'air infecté, ce qui aduient  
 ou des corps superieurs, ou des infe-  
 rieurs, & le plus souuent de tous les  
 deux ensemble : car des corps supe-  
 rieurs sont esmeus les inferieurs, ainsi  
 qu'à fort bien remarqué *Gourdon* au  
 liure premier des fieures, chapitre 2.  
 parlant de la fieure pestillentielle, ou  
 il dict, que les Planettes sont celles  
 qui gouuernent & regissent tout ce  
 qui est icy bas, & ce sont celles prin-  
 cipalement auxquelles il se fait ren-  
 contre en signe humain, lors elles  
 sont dites malefiques. Comme *Guy*  
*de Choliac* là escrit au traicté second,  
 Doctrine seconde, chapitre cinquies-  
 me de son recueil Chirurgical, où il  
 parle de ceste grande pestillence qui  
 fut de son temps, il n'est de besoin

de vous dire d'auantage les signes particuliers d'iceluy air infecté : car ils sont assez cogneus de tout le peuple, lors qu'il en meurt plusieurs d'une mesme maladie, en mesme lieu, en mesme temps, d'une mesme famille. Et pource il faut rapporter tout ce que dessus, en vne cause commune qui est l'air alteré & corrompu, Pour le regard du iugement & pronostique, c'est vn acceaume entre les Medécins, que és maladies aguës le iugement est difficile ; Or la peste est vne des plus aguës, aussi le plus souuent en icelles le iugement est sinistre & peu asseuré. Comme dit *Hipocrates* en ses Pronostics, & *Gordon* au chapitre sus allegué, dict que quand aux pronostiques des fieures pestillentiellles, que toutes sont de tres-mauuaises terminaison auec terribles accidens. Et quand l'on attend



vne bonne crise, bien tost aduient la mort, & sçachez qu'és maladies aguës l'on ne peut certainement iuger de la vie ou de la mort.

Quand est de la precotion ou preservation, ie desire vous en faire entendre quelque chose: car pour la cure il sera assez à temps lors qu'il aura pleu à Dieu nous affliger selon nos demerites, que ceux qui y seront employez l'exécutent bien & deuëment; Mais pour le sçauoir faire il faut qu'ils en soient reuenus, & qu'ils y ayent seruy de bons Maistres. Ce que bien souuent ne se fait pas au grand detriement du public. Partant ie ne vous diray dauantage de la cure, d'autant que telle chose ne vous peut seruir, & n'appartient qu'à ceux qui en font profession, pour ce qu'il y en a assez d'autres que moy qui en ont escrit, mais peut-estre que peu en font re-

uenus pour en rapporter vne certaine experience & avec plus de certitude; Non que ie veuille parler de moy : Car si ie voulois escrire tout ce qui dépend de la peste , ie ne le pourrois pour deux raisons, l'vne pour le peu de capacité & suffisance qu'il y a en moy, l'autre que ie suis trop ieune d'experience , d'autant que routes les fois que la peste arriue, elle change de façon de faire, & ces accidens sont diuers. Et partant telle chose seroit mal seante à vn apprentif, ainsi que sont tous les hommes, d'estre si outrecuidé de vouloir escrire apres tant de Doctes Personages, lesquels avec peine & trauail ont vsé leur vie, & despencé leurs biens, à curieusement rechercher les merueilles de la nature, dont ils ont acquis vn los inestimable, Recom-pence à la verité digne de leur meri-

te, pour auoir laissé à la posterité des bagues de si grand prix, comme a fait *Hipocrates* & *Galien* en toutes les parties de la Medecine & Chirurgie, se sont les deux qui ont le mieux escrit de tous les anciens, comme il se voit par les liures qui touchent, ce qui est de la cognoissancé de la peste, ainsi qu'il appert és liures des Epidimies, *Galien* en ses Commentaires sur les dix liures, & sur les liures de *dietta Acutorum*, & aussi les liures des differences des fieures, ces deux Autheurs sont les premiers, auxquels nous sommes les plus obligez pour auoir mieux escrit & traicté de la peste cōme ont fait Monsieur *Ellain*, & Monsieur *du Port*, tous deux Docteurs Regents en la faculté de Medecine en ceste Vniuersité de Paris. Et Monsieur *de Nansel*, Medecin à Tours en l'an 1580. Monsieur *Ioubert*, Monsieur *Fabry*,

& Maistre *Ambroise Paré*, au 22. li-  
 ure de ses œuvres, & plusieurs autres,  
 lesquels n'ont rien obmis en ce qui  
 est de la cognoissance de ceste mala-  
 die & des remedes propre à icelles.  
 Mais bien ie desire vous faire enten-  
 dre quelques experiences que i'ay fai-  
 tes entre les malades de ceste maladie,  
 soit en seruant les Maistres, & specia-  
 lement en l'Hostel Dieu de Paris, en  
 l'an quatre-vingt seize, où par la vil-  
 le en plusieurs maisons particulieres &  
 notamment en la Maison de la san-  
 té, où i'ay esté deux ans continuels,  
 en l'année 1606 & 607. à pëncer &  
 medicamenter les malades d'icelles  
 maladies, & en ces lieux i'ay veu au-  
 cuns qui par leurs folies se sont per-  
 dus, eux & toutes leurs familles, &  
 s'il en eschappoit quelqu'un il demeu-  
 roit miserable pour leurs obstinacions  
 & se sont ruinez, i'en ay veu d'autres  
 lesquels

lesquels estoient malades de la peste,  
 & ayant peur de mourir, ou d'un moins  
 s'ils eschappoient, de perdre leurs biens  
 se faisant penser à leurs maisons, ou ils  
 s'en venoient promptement à la Mai-  
 son de la santé, pour ce faire pancer:  
 Et partant mon intention est de vous  
 aduertir de quelques erreurs, lesquel-  
 les vous seruiron d'exemple pour vous  
 preseruer & conseruer à l'aduenir par  
 la ruine des autres, ou du moins qu'a-  
 lors que serez affligez que couriez  
 bien tost aux remedes. D'autant que  
 selon *Galien* au liure de l'Euacuation  
 de sang (il y a dit-il) deux manieres de  
 guerir les maladies, l'une auparauant  
 quelle soit venue, & est dicte preser-  
 uatiue; c'est celle qui empesche de  
 tomber malades: l'autre est quand  
 icelle maladie est venue, nous l'appel-  
 lons curatiue, & c'est de la preserua-  
 tiue de laquelle ie pretends succinté-

ment vous parler, non par vne grande confusion de remedes, ains par quelques moyens lesquels en parties dépendent de vous, mais comme dit *Aristote* au second liure des Animaux que nulle cause ne peut faire son actiõ que le sujet ne soit prompt & apte à receuoir son impression. Bien que cõt accaume soit d'un Èthenique & Payen, si est-ce qu'il doit estre entendu de nous Chrestiens en deux façons, en ce qui est de Dieu, & en ce qui est de la nature des corps.

Puis donc que la principale cause de la peste gist en l'ire du Createur de toutes choses, il est du tout impossible que nos corps soient conseruez & preseruez d'icelle, si nostre ame n'est disposée enuers iceluy. Et pource nul ne doit douter qu'il n'y a eu iamais peuple si grossier & barbare qui ne ce soit formé en l'esprit

quelque deité. C'est pourquoy anciennement le peuple de Lidie adoroit Apollon, furnommé par eux pestiferé, non pour estre cause de la peste, ains plustost qu'il la faisoit cesser. A ceste cause, non seulement ce peuple Lydien, mais tous les anciens Payens, Romains & autres, faisoient des statuës & effigies du Dieu Apollon reputé d'eux le premier Medecin, ils luy mettoient vn arc, & des fleches à la main gauche, & en la dextre les trois graces Déesse, voulant donner à entendre que de luy deriue le pouuoir de conseruer la santé, par le temperamment de sa chaleur & clarté radieuse, & que bien tard & quasi comme contrainct il nous enuoye la peste, & autres maladies. Ainsi *Homere* en *Liliade*, feint qu'Apollon enuoya la peste sur les Grecs, pour autant que *Agamemnon* retenoit in-

iustement Chrysis fille de Chryses son  
 Sacrificateur : De mesme *Virgile* feint  
 que les Lucquains ont eu la peste  
 pour auoir massacré Polimura. Ainsi  
*Valere* le Grand racompte au liure 4.  
 chapitre 8. que la peste ayant esté à  
 Rome pres de trois ans continuels,  
 ils ne peurent trouuer d'autres reme-  
 des que d'enuoyer Ambassade en Epi-  
 doire pour amener Esculape des ja-  
 mort & deifié, au lieu duquel ils mi-  
 rent en leur nauire vn grand serpent,  
 & l'ayant amené ils luy firent bastir  
 vn Temple en vne Isle du Tybre  
 pres de Rome. Vous voyez comme  
 l'ancien Paganisme rapportoit la cau-  
 se de la peste à l'ire ou courroux de  
 leurs faux Dieux, où plustost esprits  
 diaboliques : car les Dieux des Gen-  
 tils sont Diabes, dit le Psalmiste,  
 au Pseaume 95. C'est assez parlé de  
 ses Autheurs prophanes, craignant de



ce laisser glisser au gouffre d'heresie: car il ne se faut amuser à la vaine Philosophie; d'autant qu'icelle peut conduire les hommes à perdition. Et partant il vaut mieux prendre le chemin de nos Theologiens, selon ce qui est escrit en la Sainte Bible. Il conuient donc en citer quelque passage pour monstrier que la premiere cause de peste doit estre rapportée à la iustice de Dieu, sans lequel rien ne peut estre: car il a compté le nombre de nos cheveux & sans son vouloir il n'en peut tomber vn, ny vne feuille d'arbre. Ainsi que dit S. *Mathieu* au chapitre premier, & S. *Luc*, 12. Dieu donc bien que patient & misericordieux, voyant que les hommes perseuerent en leurs pechez sont opiniastrés, incorribles, indomptables & tardifs à s'employer à bien, il nous enuoye des maux extrêmes.

pour la punition de nos fautes. Ainsi que dit *Hipocrates* en l'Aphorisme sixiesme du premier liure, que aux extrêmes maladies il conuient des extrêmes remedes; Voila pourquoy Dieu enuoya la peste à son peuple Iudaïque, de laquelle il est parlé au premier du Paralipomenon vingt-vniesme, pour la punition tant de leurs fautes que de celle de leur Roy Daud, & en l'*Exode* 9. Dieu menassa ainsi Pharaon, maintenant estant dans ma main ie te frapperay, & ton peuple de peste. Plus au *Leuitique* chapitre 26. ayant fait infinies belles paroles à son peuple, bien gardant & obseruant ses commandemens, au contraire il denonce punition tres-griefue à ceux qui le mespriseront, leur disant quand vous fuirez es villes à cause du glaue, ie vous enuoyeray la pestilence au milieu de

vous, & ferez liurez entre les mains des ennemis. Et de rechef il dit aux *Nombres* 14. *Deuteronomie* 28. & 32. *Esaye*, *Ieremie*, 11. & 14. chapitre 29. Je les consommeray par glaive, par famine & par peste. Item, i'enuoyeray sur eux l'espée, la famine, la peste, & les mettray comme les mauuaises figues que l'on ne peut manger, parce que elle sont de tres-mauuaises. Plus *Ezechiel* chapitre 6. Dieu ayant menassé les cœurs des paillardans, apres leurs Idoles il y adjouste ses menasses ils trébucheront par l'espée, par famine & par peste. Item, au chapitre 7. le glaive est dehors la peste & la famine sont au dedans. Item, au chapitre 28. 33. & 38. il est dit, i'enuoyeray en Hierusalem mes quatre mauuais iugemens ; à sçauoir l'espée, la famine, les mauuaises bestes & la pestilence.

Il y a assez d'autres passages par toute l'Ecriture Saincte, mais ceux icy doiuent suffire pour retenir les bons en leurs bonnes œuures, & mesme pour donner terreur aux mechans, s'ils ont encore quelque estaincelle d'apprehension de la rigueur des iugemens de Dieu, qui est tant bon & misericordieux, que ne voulant perdre les hommes, bien souuent il persecutent les bons pour voir si les mechans se conuertiront à luy. Ainsi vous voyez par l'Ecriture Saincte que la cause premiere de la peste vient de Dieu pour l'expiation de nos fautes, il semble donc que le souuerain remede contre ceste peruerse maladie est d'auoir recours à iceluy, & au nom de son fils *Iesus-Christ*, avec ferme foy & assurance: car si vn seul regard du Serpent d'Airain ou de bronze esleué pour signal pouuoit  
guarir

guarir les piqueures des serpenteaux qui offençoient le peuple d'Israël, estant au desert pres la montagne de Hor. Ainsi qu'il est dit au *Nombres* 21. beaucoup plus grandes forces aura le fils de l'homme iadis esleué en croix pour nostre redemption. Si que quiconque croit en luy fermement ne peut perir, comme dit *S. Iean*, chapitre 3. Ainsi durant la persecutiō faite en l'Eglise par *Maximain* Empereur Romain, selon que rapporte *Eusebe* en l'histoire Ecclesiastique, liure 9. chapitre 8. Les fidelles furent miraculeusement preseruez de peste & famine qui par iuste vengeance oppressoient les infidelles, Gentils & Idolatre. Ainsi iadis le peuple esleu de Dieu fut en Gessan affrenchy de la gresle, tonnerre, & tempeste en *Exode* 9.

## ORAI SON.

**I**Nuocquons donc la misericorde de Dieu, & disons tous les matins, veille ô nostre Dieu protecteur de ceux qui ont fiance en toy, faits estendre sur nous ta benediction & misericorde, & nous couvrir & targuer sous l'ombre de tes aisles, à ce que ceste maligne contagion pestilente ne nous puisse enuahir ny infecter, nous, ne les nostres, & que vivant en ta sainte obeyssance nous te puissions louer & magnifier tous les iours de nostre vie, cheminant devant ta face en sainteté & iustice. Au nom de ton fils bien aymé nostre Sauueur Iesus-Christ, qui vit & regne par tout les siecles des siecles, Ainsi soit-il.

C'est ce que chantoit le bon Zacharie & S. Luc premier. Il est maintenant temps d'entrer en matiere &

vous faire entendre ce que j'ay projecté, afin de donner à cognoître à tout le monde, & spécialement au peuple de Paris le soin que j'ay du bié du public. Le dict que quelquesfois apres la ruine de quelque grande & superbe Cité, la ruine n'est pourtant si grande qu'il ne soit resté quelques vestiges des fondemens d'icelles, & suruenant quelque nouveau peuple, où bien le reste de ceux qui y habitoient auparauant, ils ne laissent de bastir de beaux & sumptueux edifices sur les fondemens des ruines precedentes, & si icelles ruines ou destruction estoient suruenue par l'obstination de ce peuple ruiné, Le nouveau tasche par tous moyens de ce conseruer à l'exemple des ruines passées. Ainsi en ce que j'ay esté à l'Hostel Dieu, & en la Maison de la santé de ceste ville de Paris, j'ay tant

veu d'obstinez qui par leur faute se  
 sont perdus & ruinez , les vns pour  
 ny venir promptement se faire pan-  
 cer estant malade , les autres pour ne  
 se pouuoir empescher d'y venir ne  
 l'estant point , preferant l'amitié de  
 leurs parens à leur vie , sans conside-  
 rer qu'il vaudroit beaucoup mieux  
 qu'il ny en eust qu'un de malade &  
 en danger de mourir, que deux, au  
 moins ils esperoient du secours en  
 leur affliction, d'un mary, d'une fem-  
 me, d'un pere, d'une mere, d'un fre-  
 re, & ainsi des autres , au lieu de se  
 garder de ce vouloir en ceste façõ mi-  
 serablement precipiter , & sans que  
 l'on les puisse retenir pour quelques  
 remonstrances qu'õ leur sceust faire, &  
 pour ce il est necessaire de les aduer-  
 tir que la peste à beaucoup plus de  
 ferosite enuers les parens à cause de  
 la simpatie , ou consanguinite qu'ils



ont les vns avec les autres, ils ne laissent pourtant d'aller iusques au liect des malades, ou ils ont veu le contraire de ce qu'ils pensoient, que iceux malades n'estoient bien traictez, mais pour vn bien souuent nous en voyons venir plusieurs malades. l'en ay veu d'autres qui estoient tant abusez encore que leurs femmes, leurs maris, enfans, ou quelques vns de leurs parens plus prochets fussent malades ou morts de la peste, & les ayant hantez & frequentez en leurs maladies ou en leur mort, ils ne croyent en pouuoir deuenir malades: Neantmoins ils disoient ou est-il possible que i'aye pris ce mal là? Où bien parlant de leurs inferieurs & seruiteurs malade, où as-tu esté chercher cela? n'ayant pas le iugement de considerer que c'est Dieu qui veut exercer sa iustice, autant sur les maistres que sur les seruiteurs, par

le moyen de l'air infecté qui les environne, sans lequel nous ne pouuons viure vn seul moment, bon ou mauuais il faut que nos esprits s'en repaissent, ce qui a occasionné *Hipocrates* au 3. liure des Epidimies, & apres luy *Galien* au premier des Chryses, de dire tel qu'est l'air, tel sont les esprits, tel est le sang, tel sont les humeurs du corps, & sur ceste erreur ils ne se faisoient voir ny pencer de bonne heure, ils se mouroient les vns par les ruës, les autres par les champs, & autres en leurs maisons enfermez, plustost que de mander les Chirurgiens de la santé, où bien si quelqu'un entre les autres les mandoit, aussi-tost qu'ils estoient proches de sa maison, il disoit, ou faisoit dire n'approchez pas de moy, ie me porte mieux, au lieu de ce faire pencer, ou bien aller en ladite Maison de la santé pour estre pan-

cez & alimentez mieux qu'ils ne ſçau-  
roient eſtre en la leur, quelques com-  
moditez qu'ils puiſſent auoir.

C'eſt vne choſe eſtrange que ceſte  
erreur à lieu entre les riches & gens de  
qualité, ceux qui ordinairement ſont  
prouueus de raiſon par deſſus le com-  
mun, auxquels l'auarice ne doit com-  
mander en ce qui eſt de leurs ſanté,  
ne veulent pourtant en ceſte maladie,  
mander les Chirurgiens qui ſont de-  
diez à pincer les peſtiferez és maiſons  
publiques, leurs raiſons ſont telles  
pource diſent-ils, qu'ils ſont cogneus  
& qu'on recognoiſt qu'ils ont la pe-  
ſte, les voyant entrer chez eux, puis  
ils diſent qu'ils ſont plus peſtiferez  
qu'eux meſme, ne ſe contentant d'a-  
uoir vne fois la peſte, ils ont peur  
qu'on leur reporte vne autre fois, en  
meſme temps, où bien que s'ils ne l'a-  
uoiet point ils leurs pourroiet bail-  
ler.

Mais ils ne raisonnent pas assez : car ils ne sçauent & ne croient qu'alors que la peste est allumée en vne ville, ou contrée, que peu d'autres maladies regnent en ce temps, & qu'ils ny ait tousiours quelque malignité ou accidens malins, lesquels ce cōmuniquent avec les autres maladies, aussi ils ne disent pas que l'ayant ils seront plustost secourus, mais au contraire ils croyent que la peste ne les oseroit prendre & qu'elle n'est assez hardie pour les attaquer, ne considerant pas que la cause qui est commune & agreable comme i'ay dit cy-dessus, gist en l'air infecté. Ainsi que dit *Hipocrates* au liure de *Flatibus*, les natures different des natures, les complexions des complexions, aussi font les corps les vns des autres, & pource il ne faut estimer que la peste soit tousiours semblables à tous, ny que les signes ce ressemblent,

ressemblent, mais ils diuersifient selon  
 les années, saisons, temperatures de  
 l'air, regions & des personnes qui les  
 habitent, comme aussi selon la natu-  
 re & malignité de la peste, qui regnent  
 pour certain temps, en certaine con-  
 trée, & des humeurs qui dominant au  
 corps des pestiferez. Specialement  
 des lieux qu'elle saisit & enuahit pour  
 sa demeure, & pour son sujet. Tou-  
 tes lesquelles choses & considerations  
 apportent des dificultez si grandes  
 qu'il est presque impossible de faire  
 iugement, ou pronostic certain de la  
 vie, ou de la mort, de la prolongation  
 de la maladie, ou briefueté de la gua-  
 rison, quelqu'un dira quand l'on voit  
 plusieurs bons signes, & qu'il ne s'en  
 trouue qu'un mauuais, l'on ne doit  
 iuger l'homme à mort par un seul  
 telmoin. Je responds que ceste ma-  
 ladie est de telle felonnie, que pour

executer son intention qui est de destruire l'economie du mó. le racourfy, qui est l'homme, & avec ce elle est tant muable en tout son progres (bien qu'il soit le plus ordinaire court & dangereux.) Aussi le plus souuent avec plusieurs bons signes vn mauvais, ne laisse de mener le pauvre malade au tombeau, & c'est alors que la nature est foible, le venin est grand, il ce fait vn conflit, selon ce que disent les Philosophes, il faut que le patient cede à l'agent; Ainsi nature succombe sous le fais.

C'est chose estrange qu'entre cent ou deux cents malades d'icelles maladies, il ne s'en trouuera pas vn, ou deux auxquels l'on recognoisse tous les vrais signes & accidens par lesquels l'on puisse definir la peste, à raison dequoy tant les anciens que modernes ont laissé ceste chose irresoluë, que

l'essence de la peste est presque incon-  
 gneuë, & quelle ne ce peut estre de-  
 finie que par ces accidens, ce qui ne  
 semblent pas à plusieurs qui ignorent  
 cette maladie, mais s'ils estoient as-  
 sez hardis d'aller aux lieux, ils verroient  
 mieux qu'ils ne pansent, Comment  
 donc est-il possible que ceux qui n'au-  
 ront demeuré és maisons publiques  
 si puissent cognoistre, veu qu'é ce lieu  
 l'on en peut voir mille en vn mois,  
 voir deux milles; Et partant ceux qui  
 ce veulent mesler d'en parler, traicter  
 ou escrire, & n'ont demeuré esdites  
 maisons, ressemblent aux aueugles  
 qui veulent iuger des couleurs, con-  
 trariant par ce moyen à ce que dit *Hi-*  
*pocrates* en sa protestation ou iurement  
 solennel, qu'il ne se mesleroit iamais  
 de tailler de la pierre, ou du boyau,  
 ains qu'il laisseroit ceste pratique aux  
 experts. Et *Galien* en plusieurs lieux

de la Therapeutique dit contre The-  
 falus que la maladie bien cognuë est  
 à demie guarie. Or pour cognoistre  
 la peste il la faut veoir de pres, car  
 toutes les raisons naturelles, & Phi-  
 losophiques ne peuuent de rien seruir  
 sans l'experience, suiuant *Galien* en sa  
 Methodeliure 3. ou il dit, que les deux  
 instruments de la Medecine sont rai-  
 son & experience: Et principalement  
 en ceste traistresse & perfide maladie,  
 laquelle n'a point de stabilité en soy:  
 C'est pourquoy le peup'e ne doit  
 craindre, ains plustost & avec plus  
 d'assurance, il se doit mettre entre  
 les mains de ceux qui ont esté esdites  
 maisons publiques.

Il ce pourra faire que quelqu'un  
 enuieux de leur bien, dira que ie par-  
 le pour mon particulier, mais ils se  
 trompe, suiuant le dire commun que  
 tant va la cruche à l'eau qu'en fin elle



se brise. Car nul ne ce doit dire pou-  
 uoir estre exempt de la peste, bien  
 qu'il l'aye eue en vne année, il n'en  
 est eschappé pour l'autre, voir deux  
 fois en vne mesme année, comme i'ay  
 bien remarqué à la Maison de la san-  
 té, l'an 1606. & 607. Encore que Mon-  
 sieur *Paré* au liure 2. chapitre 33. de  
 ses œuures parlant des Medecins &  
 Chirurgiens qui doiuent estre em-  
 ployez à pincer & medicamenter les  
 pestiferez, dit qu'ils ce doiuent faire  
 ou faire faire des cauteres en certai-  
 nes parties du corps, si dit-il, ils n'a-  
 uoient quelques vlcères qui leur cou-  
 last auparauant. Il semble qu'il veut  
 conclure que la peste soit tou-  
 siours d'une mesme nature, ne les  
 corps ne soient point dissemblables,  
 ne les années & saisons point diffe-  
 rentes, & que tous ceux qui auroient  
 cauteres ne pourroient estre espris de

la peste, cela à bien lieu en quelques-uns, mais l'experience journaliere monstre le contraire en ce qui est du general, tant s'en faut, car nous auons veu mourir beaucoup de ceux qui auoient cauterés, vlceres, hemorroides, escroüelles, poulains, verollez, galeurs, & autres semblables manieres de gens. Je ne veux pas dire contre *Paré*, & ceux qui ont escrit premier que luy de la precaution de la peste, que les cauterés, & quelques vlceres non malins ne puissent aucunement preseruer les corps, mais aussi il ne faut qu'ils les debilitent, cecy pourtant semble estre contraire: car ceux qui se sont assubjettis de porter des cauterés, cela tesmoigne qu'il y a desja en eux quelque cacochimies ou impureté. Comme dit de *Nansel* liure premier, chapitre 5. & pource il semble que l'artifice des cauterés

ne sert de guerres, veu que la nature c'est d'elle mesme formé & construit des voyes naturelles, par lesquelles elle euacuë quelques humeurs ou excremens viciieux, soit en quantité ou en qualité, comme nous voyons les mois ordinaires aux femmes, & les hemoroides à quelques hommes, & pourtant la nature ne c'est sceu rédre exemptre de la peste, pour deux raisons principales. La premiere c'est que dés nostre premiere generation. Il reste en nous quelques vice du sang menstrual, & faut qu'il soit esuacué par la rougeole, petite verolle, & par la peste. Ainsi que le dit *Gordon* au chapitre de la petite verolle. Occasion pourquoy ceux qui ont eu vne fois ses maladies, l'on voit qu'ils ne sont tant subjets à les reprendre pour la seconde fois, ou du moins ils ne sont pas tant en danger de mort que ceux

qui les eüë ont pour la premiere fois; car le seminaire ou aptitude qui les rédoit disposée à ce dāger est en partie éuacué, selon *Galien* au liure des difference des fièvres. La seconde raison est du mesme *Galien* liure 6. chapitre 5. des lieux patients, où il dit, que en nos corps ce peut iournellement engendrer vne substance approchant de la nature du venin.

Mais bien ie diray avec tous ceux qui ont escrit de la peste, que pour ce preseruer & conseruer. Il faut sur toutes choses esuiter l'air corrompu, & pestiferé, & ne point commettre d'excez en la maniere de viure, ny en les autres déportements, ne point manger des viandes difficile adigerer, cruë, ne corrompuë & ne boire trop de vin soit bon ou mauuais; i'entends du mauuais par cōparaison du moindre au plus fort : car le mauuais absolument

folument & par corruption , lequel  
 doit estre du tout rejezté pour en estre  
 fait du vinaigre, dequoy l'on ce pour-  
 ra seruir en ceste maladie, ainsi que ie  
 diray tantost. De mesme l'on doit re-  
 jeter toutes autres sortes de denrées  
 qui facilement se corrompent & n'e-  
 stant corrompuë peuvent seruir d'a-  
 liment , comme sont herbages, frui-  
 ctages, poissons, spécialement celuy  
 qui vient de la mer : Esquelles den-  
 rées il y à vn grand abus : car si on  
 les vend corrompuë lors que la peste  
 n'est pas, ils le doiuent bien estre d'a-  
 uantage alors quelle regne puis qu'ain-  
 si est que les corps animez reçoient  
 si aisément corruption, comme l'hô-  
 me durant la peste, & toute autre for-  
 te d'animaux, tant volatiles terrestres,  
 aquatiques, & reptilles, estant rem-  
 plies de leurs esprits viuifiants, lesquels  
 s'opposent autant qu'il leur est possi-

ble, à icelle corruption, & elle ne vient pas feulement de l'air infecté, mais aussi des viandes que nous mangeons, ou des liqueurs que nous buvons, & de même que sont les aliments, de même sont les humeurs, Et pour ce Messieurs de la Police font vn grand bien à la republique, d'y prendre garde, quelqu'un dira pourquoy ie d'y qu'il ne faut boire trop de bon vin, veu que le bon vin est vn des vrais antidotes & contrepoisons de la peste. Il est vray, mais ie respond que toutes choses en excez, quelque salubrité qu'elles contiennent en soy, elles sont neanmoins vitieuses, & nō naturelles: Il me pourroit objecter de rechef, & dire que la plupart de ceux qui hantent, & frequentent les pestiferez comme sont les gardes, porteurs de corps, & airrieurs de Maisons ne font estat que de boire,

& pource ils disent estre preseruez, par ce moyen ie respond qu'ils ont accoustumé de boire, & de hanter les pestiferez, laquelle coustume c'est reduit en habitude, comme ie monstreray cy apres plus amplement.

Aussi que la plus-part de telles gens sont determinez, lesquels sont despoüillez de toute crainte & apprehension. Il ne faut pareillement boire trop d'eauë si ce n'est principalement celle qui vient des riuieres ou fontaines nettes & coullantes; Il faut aussi dit *Galien* au premier des temperaments, & au troisieme des Epidimies, que toutes personnes qui se veullent preseruer de peste ayent esgard à vne seule & principale intention: Sçauoir est, qu'il faut que le corps soit totalement purgé des superfluitez, puis qu'il aye libre perspiration, apres qu'il s'oppose en tant

que faire se pourra à la cause qui domine. Outre il faut s'estudier d'affoiblir & eneruer la cause agente, & s'efforcer de rendre le corps patient plus fort & ydoine à resister au venin. Car comme dit *Aristote* quand le patient resiste puissamment & que l'agent est debille, l'action est nulle, ou bien petite. Tout cecy n'est autre chose à dire sinon que durant la peste, il faut tenir vne telle modestie en la disposition du corps qu'il ne soit point trop rempli d'humeurs ny affoibly par purgation, seignée, ne par exeez de viandes qui pourroient estre cause d'une obstruction, & se faisant les esprits n'auroient pas libre perspiration, de mesme l'on ne doit point commettre d'exercice immoderé, & specialement par l'acte venerien. Car il ny a rien qui affoiblisse tant le corps & qui resoluë tant les esprits qu'ice-



luy acte, duquel il est presque neces-  
 faire de s'abstenir avec la femme quād  
 ceste maladie regne, au moins l'Esté  
 alors que la chaleur est grande, d'au-  
 tant qu'il debilité les sens, affoiblist  
 le cerueau : bref, il rend le corps dis-  
 posé à la peste, & c'est ou elle exer-  
 ce plus sa tyrannie, sur les corps qu'el-  
 le rencontre foible & debile. De  
 mesme aussi le trop grand trauail est  
 tres-dangereux non seulement à cau-  
 se qu'il affoiblist les facultez du corps,  
 mais pource qu'en ceste action il faut  
 respirer beaucoup & souuent, & l'air  
 estant infecté, le venin pestiferé se  
 peut introduire & glisser en nostre  
 corps par ce moyen, il faut aussi ce  
 tenir nettement soit en sa maison &  
 en ses habits, ce qui monstre assez  
 que les pauvres sont plus subjects à la  
 peste pour leur salleté & necessité, Et  
 quelques riches pour leurs excez.

Il me souuient d'auoir esté durant la peste en des maisons de ceste ville, visiter quelques malades, ou il faisoit si sale, que j'estois contraint de leur dire, vous ne deuez vous estonner pourquoy la peste vous à pris, il y a long-temps que la gardez chez vous, il ny a rien entre toutes les causes particulieres de la peste qui ayent tant de puissance de nous precipiter au tombeau que les passions de l'ame. Comme dit *Paré* en son introduction à la Chirurgie, chapitre 21. les passions de l'ame nuisent & retardent la guarison des maladies, & bien souuét elles en causent de nouvelles, lesquelles sont appellez de *Ciceron* aux *Tusculames*, maladie de l'esprit, & mouuement non obeissant à la raison, Et ce sont ire, courroux, tristesse, ioye, crainte & apprehension, en sorte qu'il seroit besoin d'imiter la

constance d'un *Socrate*, lequel iamais  
 ne s'esmouuoit d'auantage à ce res-  
 joüir ou contrister, mais demeuroid  
 en vne sorte que sion ne peut attain-  
 dre telle perfection, au moins se res-  
 joüir plustost qu'autrement : car la  
 ioye corrobore les vertus, comme  
 dit *Almansoart* liure 4. & conforte les  
 actions de l'ame, Mais non pas com-  
 me escrit *Plin de Chilon* Lacedemo-  
 nien, lequel mourut de ioye, voyant  
 venir son fils des ieux Olympiques,  
 ou il auoit triomphé trois fois, liure  
 3. chapitre 6. *Aulugelle* raconte vne  
 pareille histoire que *Diegore Rodien*  
 rendit l'ame deuant ses trois fils, les  
 voyant victorieux & couronnez en  
 vn mesme iour. Ce qui est arriué  
 semblablement à *Policrata* (ainsi que  
 racompte *Plutarque* au liure des fem-  
 mes Illustres) receuant le triomphe  
 que ses concitoyens luy faisoient

pour auoir esté la seule cause de recouurer leur liberté, & secoüé le ioug à *Diognetus* qui les tenoit assiegez. Si la joye qui de prime face semble estre tant salubre, & se neantmoins elle est si dangereuse.

Il est donc bien necessaire, comme i'ay dit de garder vne exacte mediocrité en toutes les actions: car la crainte est d'autant & plus dangereuse, & principalement en la peste: car les pestiferez estant saisis de ceste crainte ou apprehension, bien souvent il n'en eschappe pas de cinquante, vn. Et pource i'ay dit cy-dessus, qu'il faut esuiter & fuir les lieux pestiferez quicōque aura peur: car par la crainte ce fait ce que disent les Philosophes, plus le feu est retiré en soy mesme, c'est à dire en son centre, & plus il fait voir son effet actif, aussi par icelle crainte & apprehension le

venin pestifferé est reuocqué & attiré plus subtilement & avec plus grâde rapidité au cœur, & aux autres partyes nobles, & trouuant la nature debile, par l'angustie & retraction des esprits & humeurs trop à coup, le venin se glisse quand & quand, puis il ne cesse d'exercer sa tyrânie iusques à ce qu'il ait gagné & destruiet le point centrique de nostre vie, comme est le cœur, qui est le siege principal où reside les esprits vitaux. Quelqu'un me pourroit repliquer que l'apprehension n'est point cause de receuoir la peste, attendu que les enfans sont sans aprehension, ne laissent de gagner ceste maladie; Je respond qu'ils ont autre disposition, & les hommes capables de raison la peuuent gagner par l'apprehension, ainsi que j'ay dit. C'est ce que dit *Galien* au Commentaire 3. du troisieme des Epidemics. Pe-

ste est vne maladie laquelle en mesme  
 temps, en mesme lieu, en assaut, & tuë  
 plusieurs: De mesme au liure la *The-  
 riarque à Piso*, dict, la peste est com-  
 me vne mauuaise beste, laquelle tuë  
 & en estrangle plusieurs, voire anean-  
 ty toute vne ville & cité. Ce qui a esté  
 veu depuis 43. à 44. ans d'une noble  
 & fameuse Cité appelée Trente, ou  
 fut tenu & celebré le dernier Concile.  
 Nous voyons par là que le venin de  
 tous les animaux qui rampent sur la  
 terre, n'est si dangereux & ne destruit  
 tout le commun des hommes, com-  
 me fait celuy de la peste. D'autant  
 qu'un animal quelque veneneux qu'il  
 soit ne pourra offencer où tuër qu'un  
 homme ou deux à la fois, mais le ve-  
 nin de la peste à un seul moment en  
 peut tuër mille voire dix mille, selon  
 l'estendue du venin. Outre ce, si quel-  
 qu'un desdits animaux a picqué ou

mort l'homme, iceluy venin est cogueu par la playe, par les accidents, par la quantité ou qualité du venin, & par l'espece de l'animal. Ainfi que dit *Matheole* au Commentaire sur *Dioscoride* liure sixiesme, chapitre 40. *Gordon* liure premier au chapitre des venins, & *Paré* liure 21. soudain l'on court aux remedes. De mesme en la maladie venerienne, bien qu'elle soit contagieuse. Si est-ce que ce n'est que par attouchements; mais la peste est bien plus fine: car elle prend par le nez, par la transpiration des pores se communiquant aux arteres pour soudain s'attaquer aux esprits vitaux & animaux. Au contraire de la grosse verolle, laquelle à son siege plustost aux humeurs qu'aux esprits. Estant donc ce venin pestiferé entré en nostre corps, il exerce deux ou trois iours sa cruauté aux parties interieures; prin-

cipalement aux esprits ou facultés  
residantes és trois parties nobles. Puis  
apres il ce manifeste au dehors, & le  
plus souuent alors il ny à plus de re-  
medes, & les pauvres malades quel-  
ques fois avec tout cela cellent bien  
souuent leur mal de peur d'estre scan-  
dalisez, ne veulent mander les Chi-  
rurgiens, s'excusant sur ce qu'ils di-  
sent qui ne sçauent si c'est la peste.

Encore que bien souuent qu'ils  
ayent hanté & frequenté leurs parés,  
amis, ou voisins qui seront morts su-  
bitement, il leur semble toutesfois  
que ce soit sans cause, mais ils ne la  
cognoissent, ou ne la veulent cognoi-  
stre, Encore qu'ils voyent comme i'ay  
jà dict qu'en mesme lieu, en mesme  
temps, d'une mesme maladie, & d'une  
cause commune telle chose se doi-  
uent rapporter, dit *Galien*, à l'air in-  
fecté, & partant ceste maladie doit



estre appellée peste, vous deuez donc vous faire voir de bonne heure, afin que courriez aux remedes.

C'est icy le seul sujet qui ma induit à vous escrire : car i'ay dit que si les remedes ont quelque vertu ou faculté contre le venin pestiferé, ils doiuent estre prins & baillez dès le premier iour, voire auparauant que l'on se sente estre malade. Ainsi que dict *Claude Fabry*, au commencement de l'Epistre de son liure de la peste, mais quelquesfois l'on neglige les antidotes ou remedes combattant le venin, & ce pendant la maladie empiette estant tres-aguë, & precipitée en ses temps. Il conuient donc de mesme precipiter les remedes; puis que la peste ainsi que i'ay dict ailleurs, est tant muable en tout son progrez, de laquelle l'on ne scauroit auoir vne parfaite cognoissance.

que par la seule experience, il faut aussi vser des remedes les plus certains, & experimentez. C'est ce que dict *Iean Damascenes* en l'Aphorisme 7. & 34. qu'il faut vser des choses approuuez par experience, & sur tout esuiter la confusion des remedes. Or tous les Autheurs anciens & modernes sont d'accord que le meilleur de tous les remedes, & le plus approuué contre ceste maladie, & auquel l'on recognoist plus d'effet, c'est *la Theriacque* de Venise, & celuy de Lyon, qui fut fait & composé l'an 1619. par *Louis de la Gryne*, Iuré & garde Apoticquaire en ladite ville. Comme dict *Matheole* au lieu sus allegué, non pas celuy que les Charlattans & Bastelleurs vendent, ains celuy duquel *Galien* a fait vn liure entier, recogneu & approuué auoir vn grand effet contre tous les venins,

& contre la peste, non seulement pris par dedans, mais aussi applicqué par dehors sur laposteme, que le vulgaire appelle improprement peste, mesme en faire vne emplastre pour applicquer sous la mamelle gauche, au lieu ou l'on sent battre le cœur. Ce remede semble estre le premier & le dernier contre les choses veneneuses: Comme *Guy de Chauliac* le certifie traicté second, doctrine premiere, qui veut que ceux qui ont la Gangrenne, Il l'ordonne pour deffendre les vapeurs malignes & veneneuses, faisant vne emplastre sur la region du cœur du malade, & luy en faire boire en potion. Ce qui a esté dit auparavant luy, de *Galien* au cinquiesme liure des Facultez des simples. Et au liure de la *Theriacque Apiso* chapitre 18. & 27, a dict que tels medicaments, comme ventouses attire au

dehors tant par leur chaleur naturelle, que pour la similitude de leur substance, estant mise sur le venin & poison comme d'un fromage : chascun le poison de part en part, deuant soy. Le mesme *Galien* faisant desnombrement particulier des remedes contre la peste & les venins, dit que les plus insignes & exquis remedes sont la *Theriacque*, le *bol d'Armenie*, & la terre *Sigillee*. Asseurant que qui conques en a vsé de bonne heure en la peste qui lors estoit en la Grece, il n'est iamais succombé. Et tout ainsi, dit-il, que le feu purifie l'air infecté ainsi la *Theriacque* est semblable a un feu purgatif, altere & corrige la corruption pestillente preservant de la peste, & la guerir estant ja presente, ce sont les mots de *Galien* au liure de la *Theriacque Apiso* chapitre 28. & au 9<sup>e</sup> des simples facultez, l'experiance de ce

de ce remede à contrainct *Gordon* au chapitre des venins de l'ordonner cōtre la piqueure, & morseure, de tous les serpēts; Mesme *Paré* en son 21. liure, en dict de mesme, ie croy qu'il là appris de *Gordon*. La *Theriaque* peut estre donc dit le vray à l'exitaire & contrepoison de la peste, ainsi que ie l'ay recogneu par experience entre tant de malades par plusieurs années, mais entre le peuple il est le moins prisé & estimé, & principalement entre les riches, delicats, & ceux qui n'ont appris de prendre breuuages & Medecines de mauuais goust, eux qui le plus souuent ont appris de commander & non d'obeir, ne veulent prendre vn remede mal plaisant, ne considerant pas le bien qui en peut reüssir, & souuent il leur faut desguiser le goust, & en ce faisant augmenter la quantité de drogues aussi

mal plaisantes, & diminuer la quantité nécessaires de celles qui operent le mieux, comme fait la *Theriacque*, ie ne laisseray pourtant de le bailler pour vn grand secret que i'ay recogneu par experience de son effect, ce remede se doit administrer, prendre ou bailler en ceste façon. L'Hyuer aux plus forts & robustes dès le commencement de la maladie, iusques à vne dragme & demie à la fois, avec de bon vin pur, & ce principalement aux pituiteux, melancholiques & vieillars. L'Esté à ceux qui sont de complexion chaude avec les eaux cordiales, comme *eau d'Ozeille*, *jus de Citron*, *eau de Pourpier*, *de Plantain*, *de Rose*, *de Buglose*, *Bouroche*, & de l'*Aictuë*. Et ce principalement à ceux qui sont cholériques, & ceux qui tiendront le milieu entre les deux extremités. En esgard aux sanguains, pourront vser

des eaux fufdites avec la *Theriacque*,  
 comme auffi de celles qui enluiuent,  
 comme de *Chardon benift*, d'*Euphrai-  
 fe d'Andiue*, de *Scariole*, de *Soucy*, de  
*Eulmaria*, ou *Reine des prez*, de *Cha-  
 riophilata*, de *Pinpernelle*, de *morsure de  
 Diable*, *Fenoüil*, *Scabieuſe*, *Bethoyne*,  
*Scordion*, & de pluſieurs autres deſ-  
 quelles le nombre eſt infiny. Eu eſgard  
 à leurs curieufes recherches. Et aux  
 foibles, debiles, & delicats, comme  
 aux enfans le poids d'un derry eſcu,  
 avec les eaux *Cordiales*. Et à ceux qui  
 ſont de moyenne nature, Eu eſgard  
 au ſexe, comme aux femmes & Énu-  
 ques, ou de ſemblable texture &  
 complexion vn dragme, c'eſt à dire  
 le poids d'un eſcu à la fois; i'entends  
 ceux qui ſeront deſja eſpris de la  
 maladie. Quelqu'un me pourra ob-  
 jecter & dire pourquoy indiferam-  
 ment, i'ordonne la *Theriacque* aux

femmes sans faire exception de celles qui sont enceintes, attendu que plusieurs des anciens ont fait scrupule, ou difficulté de leur administrer, disant que sans auoir esgard à la maladie, que la *Theriaque* estoit cause de les faire aduorter. A cela ie respond, pour ne point auoir de contention avec eux, sur la composition d'iceluy *Theriaque*, pour sçauoir examiner s'il y a quelques ingrediens, ou drogues qui soient prouocatifues de chasser le fruit hors du ventre de la mere, aupara-  
uant le temps prefix de nature; le d'y que puis que de deux maux, il faut eslire le moindre, ie ne l'administre-  
ray donc & bailleray à prédre qu'aux femmes grosses qui seront des-jà es-  
prises de la peste. Suiuant l'*Aphorisme* 30. du liure 5. *Il est mortel qu'une fem-  
me grosse soit esprise de quelque maladie  
aigüe, & fièvre continuë.* Or la peste



qui est, comme i'ay dit, vne des plus  
aiguës, il conuient donc s'il est pos-  
sible sauuer la mere ou l'enfant: En-  
core que peu souuent en la peste tel-  
les choses arriuent. Car nulle femme  
ou bien peu eschappent d'icelles ma-  
ladies, qu'estant grosse ou enceinte  
qu'elle n'accouchent, soit au terme  
ordonné de nature, ou auant iceluy  
par la malignité du venin & chaleur  
estrangere, & estant accouchée pen-  
dant quelle ont la fièvre, ils n'eschap-  
pent ne la mere ne l'enfant, & si tant  
est qu'elles accouchét apres que la fié-  
ure les aura laissée, elle sont en aussi  
grand danger quelles ont esté, ayant  
la fièvre, soit à cause du trauail de  
l'accouchement, que aussi pour quel-  
que charbon ou thumeur quelles ont.  
Ioint qu'elles sont encore avec les pe-  
stiferez, il se pourra faire donc que  
pour quelques mauuais regime de

viure, & qu'elles ne font encore hors de l'infection, ils ne leurs suruiennent quelques fièvres malignes, laquelle bien-tost cause la mort, ou vne grande indisposition, comme la gangrene, laquelle aduient ordinairement en la partie en laquelle l'aposthème estoit, & spécialement éshaines, laquelle partie est prochaine, la où nature veut ietter ce qui luy nuict, & bien souuent par ce grand desbordement tout à coup, il ce fait destruction de la chaleur naturelle en ceste partie.

A raison dequoy si quelques femmes eschappent de ce grand mal, elles se resouuiennét toute leur vie de la peste: car s'il y en a vne exempte de la mort, il en meurt trente, de mesme façon, toutes lesquelles choses i'ay veüe, recogneuë, & bien confiderées en l'Hostel Dieu de Paris, & en

la Maison de la santé, ie diray donc que pour ceux qui ce voudront conseruer en temps de peste, & ne voudront prendre la *Theriacque*, toutesfois ils le pourront faire en la façon que i'ay dit, & mesme sans estre malades, il y a assez d'autres moyens qui ont esté baillez par d'autres que moy; ce ne seroit qu'une reditte, de laquelle l'on feroit aussi peu d'estat que des autres; Mais bien ie bailleray si apres vne *Opiatte* avec autant d'effect comme elle est aisée à preparer & sans grand cousts, soit qu'on ayent pris la *Theriacque*, ou d'icelle *Opiatte*, il faut faire coucher le malade chaudement, l'un ou l'autre remede, le fera suer, apres il sera essuyé, cecy est approuué de *Galien*, & *Gordon* le recite au chapitre 10. du premiere liure des fièvres, ou il dit qu'il y a deux sortes de sueurs en general, l'une natu-

relle de laquelle la nature est allegée.  
 Selon *Hipocrates* en ses *Aphorismes*  
 & *Pronostic*, & c'est celles lesquelles  
 viennent és iours Chritiques, toutes  
 les autres especes de sueurs, qui  
 n'allegent point la nature, ains en est  
 molestée, sont dites *Simptomatiques*.  
 Et pource, dit *Gordon*, que tant à  
 l'une que à l'autre, l'on doit essuyer  
 le malade apres la sueur : car, dit il, si  
 l'on n'essuye le membre auquel est la  
 sueur, elle le corrompt principale-  
 ment és fièvres pestillentiellles, & pour  
 ce la sueur est vn des plus certains si-  
 gnes de la guerison, estant faite par  
 la nature, & aydée par les remedes  
 pour la grandeur de la maladie : Car  
 par icelle sueur ce fait éduction d'une  
 grande quantité du venin ; A rai-  
 son dequoy nature estant deschargée  
 elle expulse plus à son aise le reste,  
 de ce qui la molestoit. Partant que le  
 peuple

peuple se desifte de l'une de ses erreurs , qui est que voyant quelqu'un malade en leur maison , le font promener au vent & au froid , au lieu de le faire chaudement coucher : car nature ne peut faire deux actions contraire en un mesme temps ; qui est de combattre le venin & de supporter un exercice immodéré, par lequel le venin pestiferé fait mieux sa fonction , & en cela il est recogneu de ceux qui en ont une experience journaliere, que la difference essentielle , laquelle on peut dire par comparaison des autres accidens qui accompagnent la peste, que dès le premier iour, voire à l'instant que le malade est frappé, il y a ordinairement lesion & l'abolition de toutes les facultez & actions du corps ; De telle maniere que le malade à peine ce peut il soustenir , comme s'il auoit eu la

torture ou question extraordinaire. I'ay dit cy-deuant qu'il falloit fuir & esuiter les lieux infectez : Toutesfois ie conseillerois volontiers aux plus asseurez, esuitant les execez, gardant vn bon regime de viure, & se despoüillant de toute crainte & tristesse, vsant de quelque preseruatif, de ce tenir en leur maisons, afin de conseruer leur famille, ne leur donnant terreur, & pour preseruatif, il semble que cestuy-cy doit suffire. *Il faut prendre vne once de bonne Theriacque de Venise, comme i'ay dit, & non pas de celuy qui est nouveau faiët, mais bien de quatre ou cinq ans, avec vne demie once de bon Metridat, de la poudre de racine d'Angelique, d'Enula Campana & de Bol fin de chacun deux dragmes, conserue de fleurs de Romarin, de Violette, de Bouroche, ou Buglose, de Bethoine, & de Scabieuse, de chacune*

vne once, du *Saffran* demy dragme,  
 y adjoûtant du *Bezoïard* vn scrupule,  
 c'est la troisieme partie d'un gros,  
 avec vn grain ou deux de *Musc*, apres  
 l'on gardera cét *Opiatte* dans vne  
 boëtte bien close pour en vser tous  
 les matins en temps de peste, la gros-  
 seur d'une avelaine, de laquelle mes-  
 me l'on peut faire vne liqueur dis-  
 soudant vne demie once d'icelle, avec  
 vn demy septier de bon vin au temps  
 d'*Hyer*, & aux complexions pitui-  
 teuses & melancholiques, pour pren-  
 dre à deux fois, & en *Esté* avec de  
 l'*eauë Rose*, ou des eaux *Cordialles*, ain-  
 si que j'ay dit, aux complexions bi-  
 lieuses & sanguines. De laquelle liqueur  
 l'on se peut frotter tous les iours, auant  
 que sortir de la chambre, à scauoir les  
 haines, les aisselles & sous la mamelle  
 gauche, comme j'ay dit ou l'on sent  
 battre le cœur. Et apres si les reme-

des ont quelque vertu ou faculté contre la peste, il ne faut craindre pour tout le iour, il ce pourra faire que quelques-vns diront que ie sçay que ce remede, & que i'en fais comme d'une selle à tous cheuaux; ie leurs responds deux choses. La premiere est que i'ay voulu imiter Maistre *Jean Gæurot*, Docteur en Medecine, & Medecin du grand Roy *François* premier du nom, lequel en vn traicté de la peste n'auoit pour tout remedes preseruatif qu'un ou deux, dont il est à propos que ie les rescites. Prenez, dit-il, chez l'Apothicaire pour trois deniers de bol d'Armenie, & le mettez en poudre, laquelle faiçtes tremper vne heure ou deux en eau de Vinette, puis le laissez seicher à l'ombre. Et de rechef le mettre tremper en eau de Vinette par trois ou quatre fois, en le laissant tousiours seicher, comme



dict est, & le garder en vn fachel de cuir pour en vser si mestier est, elle se garde longuement. Item prenez racine de *Souchet* seichees à l'ombre, du *Saffran*, de la graine de *Moutarde*, autant de l'une que de l'autre, mettez ces choses en poudres & incorporées, avec iceux du *Metridat*, autant d'un que d'autre d'iceux, avec fort vinaigre, en maniere d'*Opiatte*, & la gardez en vne boëtte, ou en maniere de *Trochisc* seichees à l'ombre, & en vsez le poids d'un escu, avec vn doigt de vin, & autant d'eau *rose*, il ne faut pas, dit l'Autheur, auoir tant d'esgard à la fièvre, en baillant des remedes de qualité chaude, qu'à la cause d'icelle. Et és iours ensuiuans, ne laissera pas d'en prendre loin du repas, comme enuiron vne heure de ladite poudre de *bol d'Armenie* vne fois le iour seulement, avec *Sirop de Ly-*

mons, eaux de *Vinette*, ou de *morsus Diaboliq*, ou *Souchet*, & de *Char-don benist*. La seconde raison ie dict que c'est assez d'augmenter ou diminuer la quantité selon la malignité du venin; selon la force du corps, selon la complexion d'iceluy, selon l'age, & selon la saison de l'année, ie sçay bien qu'il y à trois genres de médicaments, lesquels selõ *Guy de Chauliac* en son traicté 7. doctrine premiere, chapitre 4. de l'autorité de *Galien*, au 5. des simples, & *Auerrois* au cinquiesme colliget, chapitre 3. disent que les médicaments opperent en ceste maniere, les vns par leurs qualitez elementaires comme eschauffer, ou de refroidir, les autres par ce qu'ils suiuient lesdites premieres & sont appellées substantielles, comme celles qui ont à repercuter, ou repousser, à titer, resoudre, ramollir, mondifier,

r'engendrer chair, & appaiser la douleur, Et les troisieme ont à faire lesdites actions en certaines parties, comme aussi en certaines maladies, lesquelles sont dites operations, vertus spécifiques ou formelles, comme sont les medicaments purgatifs, & ceux qui font voir clair, sous lesquels genre ie croy que les alexitaires sont contenus; & partant il semble que la *Theriacque* soit bonne pour tous, puis quelle à ceste propriété de combattre le venin.

Quelqu'un dira pourquoy ie leur ay conseillé de se tenir en leur maison, veu que j'ay dit qu'il faut fuir les lieux pestiferez, j'ay dict cecy pource que la peste ny les autres maladies contagieuses n'ont point de lieu particulier, mais nous voyons par experience, que le venin non seulement pestiferé: Mesmes les autres aussi se

rendent habituels de peu à peu a nostre nature , telle chose est assez manifeste à ceux qui sont iournellemēt avec les pestiferez , & ne deuiennent point malades : Nous voyons aussi par les histoires que *Metridates* Roy de Pót, d'où est appellé le *Metridat*, apres auoir perdu vne grande bataille , ne voulut que son ennemy trióphast de luy, il se voulut faire mourir par vn desespoir , il ne sceut trouuer vn venin assez fort pour s'empoisonner , à cause qu'il auoit esté nourry de tout temps aux venins. Ie ne soustiét pourtant qu'il ne faille s'abstenir (s'il est possible) de hanter & frequenter avec les pestiferez , & suiure le conseil des anciens, *qui ont dit , tost partir , loin fuir, & reuenir tard*, & avec ce il faut tousiours auoir le vent de la peste au dos , & l'aquilon à la face : Cela est bon , mais afin qu'ils ne soient despourueus

déspourueus d'armes pour combattre leur ennemy s'il les vient attaquer. Et pource ils doiuent porter quelques remedes ou preseruatif, d'autant que la peste entre les plus sains & asseurez, est à craindre. Comme dict de *Nansel*, en son liure de la peste; c'est pourquoy Monsieur *Pigret* autheur de nostre temps en vn petit traicté qu'il à fait de ceste maladie, à bien dict que la peste estoit vne indisposition, qui cherchoit vne santé à se mettre, comme est celle qui est tres-maligne: car en peu de temps elle tuë le patient; Et pource les anciens l'ont appelée par derision trouisse galand: d'autant que les plus forts & robustes sont les premiers terrassez, où du moins leur laisse le caractere ou marque de sa malignité, comme ame-grissement ou marasme de tout le corps, ou de quelque partie, oubliant

ce, ou perte de memoire, voire quelquesfois de leur propre nom, conuulsion, ou l'esion du mouuenēt, auueuglement, ou du moins perte de l'un des yeux, quelques vns ont vne claudication perpetuelles, autres deuiennent hydropiques, les autres paralytiques : Et semblables indispositions que j'ay veuës en l'Hostel Dieu, en l'an 1596. il y auoit vne grande peste pour lors, & en la Maison de la santé, en l'an 1606. & 607. lesquelles indispositions arriuent à ceux qui pour la debilité de la nature & la quantité & malignité du venin. Ce fait des crises imparfaites, lesquelles font naistre assez d'autres maladies ou accidens qui seroit impossible de raconter, tant ceste maladie redoutable est à craindre. Comme dit *Hippocrates* au liure des Epidimies, parlant de ceste peste qui fut de son temps

en *Cranon* ville de Grece, dict qu'il y auoit des charbons qui des-accou- ploient les ioinctures, il semble donc que ceux qui s'enfuient font bien, mais d'autre costé il leurs arriuent v- ne grande incommodité & danger: car voyant quelqu'un malade de la peste en leur maison, comme maris, femmes, ou enfans, avec raison ils pre- feroient leurs vies à l'amitié qu'ils doi- uent à leurs parens, ils quittoient tout & s'enfuyoient de leur maisons, mes- mes de la ville de Paris, & estant au lieu ou ils vouloient aller ils deue- noient malades esloignez de tout se- cours & remedes, ne pouuant apres trouuer le chemin assez court pour reuenir en leurs maisons, ou estant reuenus trouuoient tout mort, & eux en grand danger, pour n'auoir esté secourus assez promptement. l'en ay veu d'autres lesquels voyant la peste

commander en ceste ville s'enfuyoiēt,  
 & ne reuenoient que de six mois, ou  
 vn an apres, ils ne laissoient pourtant  
 de deuenir malades & mourir de la  
 peste, Entr'autres vn ieune Aduo-  
 cat ayant peur de ceste maladie qui  
 estoit à Paris, il s'enfuit à Poictiers,  
 & reuenant six mois apres il fut fra-  
 pé, & en mourut, il est enterré à S.  
 Medard. De mesme i'ay veu quel-  
 ques-vns de mes seruiteurs, en l'an  
 1606. Ayant eschappé le peril d'estre  
 malades au milieu de bien deux mille  
 qui auoient esté en la Maison de la  
 santé, & l'année ensuiuant ny en ayant  
 que vingt, il gaigna la peste. Il est  
 vray que ce fut pour vne trop gran-  
 de abstinence: car il ce vouloit mesler  
 de ieusner attendu que c'estoit en Ka-  
 resme.

De maniere que la gourmandise,  
 ny la trop grande abstinence ne con-



uient en ceste maladie, ains faut garder vne mediocrité en toutes les actiōs du corps, afin de n'agiter & esmouuoir les humeurs, & esprits. Vous voyez ceste maladie est estrange, & pour neant ne luy doit-on attribuer vne cause supernaturelle; D'autant qu'en toutes les autres maladies, il ne se voit des euenemens miraculeux, prodigieux, & si estranges: De sorte que ceux qui ont recogneu ceste maladie par experience, la peuuent admirer, & dire qu'elle peut constituer vn 4.<sup>e</sup> genre de maladies, Eu esgard à sa cause primitiue, attendu que l'essence d'icelle consiste en la fièvre pestillentielle, laquelle ne peut estre definie que par ces accidens, ainsi que i'ay dit cy-dessus. Car il ce voit des meres que selon la charité & amitié qu'elles doiuent à leurs enfans, ne les veuillent laisser, bien qu'ils ayent trois ou qua-

tre grands charbons avec la thumeur ou aposthème, que le vulgaire appelle improprement peste, soit quelle soit es elmonatoires des trois parties nobles, comme du cerueau, derriere les oreilles, du cœur, sous les aisselles, & du foye, es haines, ou quelles soit en quelques autres parties deriuant d'icelles, ou la force de la nature, la debilité du venin, & la faculté expultrice des parties nobles; en laquelle se venin auoit esté jetté; Neantmoins ne laissent à leur bailler la mamelle iusque à la mort, mesme pendant tout le temps de la maladie, couchant au près d'eux avec les autres pestiferez, au bout de tout cela ils sortoiēt de la Maison de la santé, sans gagner aucun mal. De mesme aussi, il se voit quelque mere malade & les enfans se porter bien, ne cessent de taitter leur mere pendant leur maladie, les meres

mourir & les enfans n'auoir point de mal, cela n'est semblable à la maladie venerienne, veu qu'une femme bail-  
lant la mamelle huiet ou quinze iours,  
estant malade de ceste maladie, à vn  
enfant qui fera sein, icelle luy baillera  
la verolle, autant en est-il d'un enfant  
verollé peut bailler la verolle à vne  
femme qui ne l'aura point, en autant  
d'espace de temps.

Quelqu'un me pourra dire ce n'est  
point vne chose estrange que la peste ne  
se point gagne par contactu, puis que  
generallement elle n'est cōmuniquée  
par distance, qui est celle laquelle doit  
estre estimée la plus maligne. Com-  
me celle que rapporte *Guy de Chau-  
liac*, au traicté 2. doctrine 2. chapitre  
4. ou il dict qu'elle occupa tout le  
monde, & a peine laissa elle la qua-  
triesme partie des gens. Puis donc  
que le mesme Auteur a dict en son

chapitre singulier, que nous estions  
 comme les enfans au col du Geant,  
 & que nous voyons ce que le Geant  
 voit, & quelque chose plus que luy;  
 Il me semble qu'il veut dire que nous  
 voyons ce que les Autheurs ont escrit,  
 & ceux qui sont venus apres les pre-  
 miers, & les experiences qui ont esté  
 faites par nous mesmes. Il est donc  
 raisonnable que ie die ce que i'ay veu  
 de la peste en moy-mesme: car se se-  
 roit estre trop temeraire faire comme  
 quelques-vns, lesquels pour ce cuider  
 separer du commun & ce faire esti-  
 mer plus que les autres qui aupar-  
 vant eux ont methodiquement pen-  
 cé & médicamenté les malades de la  
 contagion, ils disent n'en auoir point  
 esté malades, pensant par ce moyen,  
 ce leur semble, qu'ils seroient plus recher-  
 chez du peuple, & estant presomp-  
 tueux de ce faire acroire qu'ils ont  
 quelques

quelque remede ; duquel ils vsent pour ce preseruer ; Tesmoin celuy-là qui c'est voulu mesler d'escrire sur la peste, où il parle d'un cataplasme qu'il dict estre de l'Hostel Dieu, lequel est propre pour les charbons, mais n'ó pas en la façon qu'il l'ordonne : car au lieu de beure qui est fort propre pour suppurer & relaxer, il y adjouste de l'eauë pour oster le beure, s'il estoit bon Praticien & aussi grand Philosophe qu'il a opinion de soy, il trouueroit que le propre de l'eauë est de condenser & repousser le venin au dedans, il dit auoir demeuré en l'Hostel Dieu de Paris, ie le croy bien pour y auoir couché, mais pour y auoir seruy & pence les malades de la contagion, ie ne le puis croire, son cataplasme le tesmoigne assez : Au moins si auant que de l'escrire, il ce fut enquis de ceux qui le sçauent bien.

faire, il eust appris quel est la composition, il y a assez d'autres absurditez, qui meriteroient bien d'estre corrigez, mais ie le laisseray faire à quelque Bachelier en Medecine. Je dy donc que pour ceux qui disent auoir vn remede particulier, duquel ils se vantent de soy preseruer sans en bail-  
 ler la description au public, telles choses sent plustost son charlattan & trô-  
 peur, auquel l'on ne se doit fier ny es-  
 perer vn assureé secours pour le sou-  
 lagement d'une republique attendu  
 que la peste ne fait point eslection ny  
 acception de personne.

C'est pourquoy moy ayant eu la peste, dès l'année quatre-vingt seize, estant avec mon Maistre *Hamelin*, à l'Hostel Dieu qui pour lors estoit em-  
 ployé à pencer les malades de la con-  
 tagion en ceste ville de Paris. La par-  
 tie en laquelle i'ay eu la maladie, me

sert de pronostic certain qu'il doit ar-  
riuer vne année pestillentielle. Ce que  
i'ay experimenté assez de fois, en l'an-  
née 1606. 607. & 619. Par de grandes  
douleurs que ie sentoies en icelle par-  
tie, sans qu'il y suruint thumeurs ny  
aucune inflammation. Et alors que  
mes douleurs augmentoient, aussi fai-  
soient le nombre des malades. Moy  
estant esbahy, & pour me rendre plus  
certain, ne trouuant point ce me sem-  
ble de raisons naturelles, ie me suis en-  
quis de plusieurs, lesquels auparauant,  
& endiuerſes années auroiér eu la peste  
s'ils sentoient quelques douleurs, ils  
m'ont dit la meſme chose; Moy donc  
autant asſeuré, qu'estonné, i'ay mis en  
auant ce que ie n'ay leu, ny oüy d'au-  
cun auteur, & partant ie laisse a phi-  
losopher aux plus curieux sur ce su-  
jet: car il ne se faut point estonner si

entre toute la matiere de Chirurgie, l'õ a moins escrit de la peste, pour trois raisons. Pource que peu de bons Chirurgiens y vont, moins en reuiennent, & encore moins en escriuent : d'autant qu'il n'appartiët qu'à ceux qui en ont eu l'experience d'en pouuoir bien parler. I'ay dit cy-dessus, que l'on pouoit gagner la peste deux fois en vne mesme année, que cela soit rare, si c'est il veu & la reigle n'est iamais si generale qu'il ny ait quelque exception. Il arriuent donc que quelques vns apres que leur maladie aura coulé vn mois ou six septmaines, allant, venant & faisant leurs actions accoustumées, mangeant bien, & ne beuuant point mal, il leur prend vne fièvre en vingt-quatre heure, ou du moins en trois iours; & sans cause manifeste ne laissent de mourir : ie ne sçay si ie dois appeller cela peste, il semble que ouïy



avec Monsieur *de Nansel*, lequel en l'an quatre-vingt vn, a doctement & amplement traicté de ceste maladie, & dit que telle chose ce doit attribuer à la fièvre pestillentielle, spécialement à ceux qui demeuroient trop long-temps aux Hospitaux, & qui negligent d'en sortir lors qu'il ny ont plus affaires, pource que le venin y est bien plus grand pour la quantité des malades, & en effet les charbons & aposthemes sont plus grands esdits Hospitaux, & beaucoup plus difficile à guerir qu'il ne sont pas es maisons particulieres. C'est pourquoy ceux qui ont le moyen font bien de demeurer en leurs maisons & si faire pencer.

Puis donc que mon intentiõ n'est autre que seruir, au public, ie l'aduerti-ray encore de ce que ie recognois luy estre propre; il y a plusieurs er-

reurs entre le peuple , qui bien souuent font cause de les faire perdre: c'est que les vns estans malades ne font pas sçauoir qu'elle est leur maladie, ce font bien souuent purger sans l'ordonnance d'un docte Medecin, qui seroit tres-necessaire en ceste maaldie.

C'est dequoy l'on cestonne de la ville de Paris, qui est tant celebre, de ny auoir point de Medecins pres les malades de ceste maladie, soit aux Hospitaux où és maisons particulieres; S'il plaisoit à Messieurs de la Police, & à Messieurs de la Faculté de Medecine, y enuoyer toutes les années que ceste maladie arriue en ceste ville de Paris, deux Bacheliers, afin d'apprendre quelle est l'essence de la peste, & en quelle partie noble elle à le plus souuent son siege ou quelle choisit pour son sujet.

Et aussi qu'elles sont les differéces des

fiéures pestillentielleſ; combien elle ſont, en quoy & comment elles different des communes, & ce faiſant Dieu en conſerueroit quelque vn, ainſi qu'il a fait de moy, pour inſtruire ceux qui y ſeroient employez apres, & de ce il leur en arriueroit vne benediſtion qu'ils receuroient du peuple.

Car il eſt tres-dangereux quand ceſte maladie regne, de ce mettre entre les mains de quelques charlatans, deſquels en baillant de l'argent ils prennent quelque poudre, ou autre drogue, comme *Anthimoyne*, *Coloquinte*, *graine de Lierre*, *Eſpurge*, & *une autre drogue qui eſt aſſez commune entre le peuple qu'ils appellent Cotignat de Lion*, lequel deuroit eſtre deſſendu par la Faculté de Medecine, aux Apothiquaires & Eſpiciers d'en vendre ſi promptement qu'ils font à la ruine du public; Et autres ſemblables, leſquels peuuent

estre dits venins, entant qu'ils ruinent la nature au lieu de la soulager: car ils causent vn grand flux de ventre & vomissement en mesme temps, ce qui tesmoigne assez leur insalubrité, à la difference du medicament purgatif propre, lequel choisi & fait eslection de l'humeur superfluë, par le moyen de la nature interuenante, en ce conflict jette, l'humeur & quant & quant le medicament hors du corps: Ce que ne font pas ces drogues cy-deuant nommez, lesquelles sont mises au rang des venins. Comme dit Monsieur *Greuin* au second discours des facultez & vertus de l'*Anthimoyne*.

C'est pourquoy nous auons veu plusieurs pestiferez ayant prins telles poudres au bout de vingt quatre heures ou le troisieme iour precipitez au tombeau, au lieu de ses drogues veneneuses, cy-deuant dictes, il vaudroit  
mieux

mieux qu'ils vlassent de la poudre  
 suiuate, de laquelle l'on pourra fai-  
 re des tablettes, elle est fort preserua-  
 tiues & confortatiues. Il faut pren-  
 dre du Chardon benist, ayant esté seiché  
 à l'ombre, & le re. uire. en poudre, de  
 la semence de Citron, des fragmens de  
 Yacinthe, aussi pulu. risez, les testes des  
 Escreuisses de riuieres, de los du cœur  
 d'un Cerf, poudres de perles, du Saf-  
 fran, & fleurs de Muscade, Cinamo-  
 me ou Canelle de la meilleure, rasure  
 d'Ivoire, de chacune partie esgale, raci-  
 ne d'Angelique, la moitié de l'un des-  
 susdites, du Sucre, & de l'eau de Bu-  
 glose, quantité suffisante pour en former  
 des tablettes que l'on usera un petit  
 tous les matins, enuiron la pesanteur de  
 deux ou trois dragmes, en sortant de la  
 chambre. Ce remede sera plustost  
 propre pour les riches que pour les  
 pauvres, qui n'auront le moyen de

l'auoir, au lieu duquel il vseront de celuy-cy. Il faut prendre du bol d'Arménie le plus fin, lauë plusieurs fois en eau Rose, & desseiché avec la dixiesme partie de racine d'Angelique en poudre, dequoy l'on vsera l'hyuer avec vn petit de vin, & l'Esté avec du suc d'oseille, ou de la decoction d'icelle, l'on pourroit faire encore la recepte suivante. Il faut prendre au mois de Iuin, du Chardon benist, Pinpernelle, Scabieuse, Gentiane, Souchet, autant de l'vn que de l'autre, fleurs de Buglose, Rose rouge, de la petite & grande Ozeille, morsure de Diable, deux fois autant que des autres, faut mettre tout tremper en vin blanc, & eau Rose partie esgale, selon la quantité des herbes, lesquelles il les faut piller auparauant de les mettre en la chapelle, ou alambic vne nuit, apres le mettre dans vne chapelle, y mettant avec les autres choses, pour vne liure de-

my once de bol d'Armenie fin, en poudre, & lors que l'aurez distillé pour vne pinte d'eauë, y adiouster le poids d'un escu de Saffran, avec demy once de Sandal cytrain, en poudre, puis mettrez ladite liqueur dans vne fiole bien close, pour la laisser vn mois au Soleil; Ceste eau est fort excellente pour donner au malade incontinent apres qu'il aura esté frappé de la peste, à la quantité d'une once ou deux, selon la force du patient, y adioustant à l'heure que l'on la veut prendre, vn peu de sucre & de canelle en poudre.

Où bien l'on pourra faire ceste eauë, laquelle est tres-excelläte & doit estre appellée Theriaqualle. Il faut prendre de la Sauge, quatre onces, Lauande, Apfinte, Marjoleine, Pinpernelle, Valerienue, Melisse, Chardon benist, Tormentille, de chacun demy once, de la Ruë, Rose rouge, de chacun six once, racine de Gencienne, Angelique, Zedoire, de cha-

cun six once, racine daunée de Bistorte,  
 de Rapontique, de chacune demy once, gre-  
 nes de Genieures, grenes de Laurier, Cor-  
 riendre preparee de chacune vne once,  
 bold d'Armenie, terre Sigilee de chacune  
 vne once, & fleurs de Bouroche ou Buglo-  
 se de chacune vne once, noix Muscades,  
 Coral blanc, Giroffles, grene de Paradis,  
 Gimgembre, Poivre blanc, Galanga,  
 Cannelle Macis de chacune vne once, bois  
 Dalois, Coral rouge de chacun vn gros,  
 de Spicanardy, Cücubs, Cardamome de  
 chacun vn gros, & du Saffren demy  
 gros, Theriaque, Metridat de chacun six  
 onces. Broyez ce qui ce doit, & lais-  
 sez tremper le tout par l'espace de  
 huit iours, dans quatre pinte d'eauë  
 de vie distillez par deux fois, dans vn  
 vaisseau de verre bien bouche, puis  
 le tout au bain de Marie avec vn lam-  
 bic de verre, cela fait l'on en vsera  
 le matin trois heures auant manger,



vne once avec du vin, & pour ceux  
 qui seront frappez, il leur en faut bail-  
 ler vne, deux, ou trois once: selon la  
 force, aage, complexion, & sexe,  
 pour les faire fuer. Ceste eau confor-  
 te les fians & resiste merueilleusement  
 au venin, ce remede fut administré  
 au peuple de Lyon en ceste grande  
 peste, qui aduint l'an 1564. Dequoy  
 le peuple receut vn grand bien, &  
 mesme de s'en frotter la face, les mains  
 & le nez, celuy sera vn grand preser-  
 uatif. Ceste eau se doit faire au mois  
 de Iuin, pource que les herbes & fleurs  
 ont plus de vertu, i'ay fait distiller cet  
 eau en l'an 1619. de laquelle ie faisois  
 prendre à tous les malades que j'allois  
 voir.

Il y en a d'autres lesquels sans co-  
 gnoistre leur maladies, se vont incon-  
 tinant faire seigner, tout au contraire  
 de bien: car encore que la seignée fut

bien faite , si est-ce pourtant qu'elle  
 n'est pas tousiours necessaire à la pe-  
 ste, si elle n'est faite en temps & lieu,  
 & en certaines personnes. Comme  
 aussi és propres parties ou il conuient  
 la faire : d'autant qu'il se voit des an-  
 nées pestillentiellles, esquelles en quel-  
 ques personnes que ce soit la phle-  
 bothomie n'est point conuenable,  
 comme aussi en certaines années la  
 purgation est du tout contraire , &  
 en toutes années pestillentiellles, ny  
 l'un ny l'autre de ces deux remedes  
 ne sont gueres propres, s'ils ne sont  
 administrée par gens doctes & expe-  
 rimentez en ceste maladie: car de plus  
 de deux mil qui sont entrez en la mai-  
 son de la santé, & de bien huiet cens  
 qui en sont sortis, il n'en a pas esté sei-  
 gné vingt, pource que nous n'auons  
 pas trouué que la seignée leur fust  
 beaucoup profitable, en ceste année-

là; le dit estant fait à cause de la fièvre pestillentielle : car apres que l'aposthème estoit ouuerte, & auoit coulé quelque temps s'il suruenoit d'autres maladies ou accidens, nous ne faisons point de difficulté de les seigner & purger.

Car qui seigneroit ou purgeroit vn malade de la peste, ayant vne aposthème ouuerte sans necessité vrgente ce seroit mal operer, d'autant que l'on peruertiroit nature faisant retraction du venin du dehors au dedans: Je ne veux oublier à dire que i'ay recogneu vne grande erreur entre les auaricieux, lesquels preferent leurs biens à leur vie, & quelques-uns de leur famille estant morts de la peste en leurs maisons, ne tiennent compte de les faire nettoyer, ce fondant sur vne autre erreur trop commune entre le peuple, qui est comme ils

disent, qu'après que le corps mort n'est plus en icelle maison, le danger en est dehors & qu'il emporte le venin & le mal quand & soy; ce qui est vne absurdité tres grande, comme dit Monsieur *Ioubert*, en l'explication des doubtes ou ambiguites de son traicté de la peste, chapitre 3. ou il dit, que tant que la chaleur naturelle à de puissance pour resister au venin, iceluy en est plus rabbatu: car alors qu'elle est estaincte, le venin en est beaucoup plus dangereux, & la charongne du corps mort de la peste rend la maison plus infectée; c'est pourquoy il la faut faire nettoyer, ensemble tous les meubles, comme draps, laines, linges, brusler les vieilles nattes, & mesme ouvrir les coffres, & esuenter tout ce qui en soy peut contenir tant soit peu d'air ou vapeur qui peut estre susceptible de la

la peste: D'autant, comme dit *Aristote & Plutarque* au liure premier des propos des Philosophes, chapitre 10. il ny à rien de vuide que le vuide mesme, & à faute de ce ils sont tous estonnez que la maladie rescidiue en leurs maisons, la mesme année ou celle d'apres, comme nous auons assez de fois veu: c'est donc mal argumenté & la consequence ne vaut rien de dire que les corps morts de la peste estant hors du lieu ou ils sont morts que le venin en est hors. Car si cela estoit il n'en mouroit iamais qu'un en vne mesme maison, ce qui se voit du tout contraire: car non seulement il ce voit toute vne famille plustost mourir ou estre malade de ladite maladie, en diuerses maisons, que non pas des estrangers, ce qui aduient à cause de la proximité des complexions & consanguinité des humeurs,

aussi pour l'amitié qu'ils ce portent ils ne le peuuent empescher de se voir & frequenter, ce qui est tres-dangereux entre toutes personnes, mais encore plus entre les parens.

Ce n'est pas assez d'auoir nettoyé la maison, & de ce tenir nettement il faut encore faire quelque parfums & subfumigations, afin de chasser & corriger la qualité maligne de ce venin, jà introduit en ce lieu, mesme aussi pour empescher que le mauuais air ny vienne dauantage, car ceste maladie est sujette à recidiuer par la negligence de ceux qui mesprisent sa malignité ; C'est pourquoy il ne faut obmettre à dire qu'é l'Esté, ou en saison chaude, & lors que le vent de Midy souffle elle est plus contagieuse, & semble estre moins mortelle, & neantmoins il y a icy vne contrariété pource que les porres du cuir estans

ouuerts la qualité maligne se peut introduire aux parties nobles, ainsi que i'ay dit, Et tout de mesme que le mal a esté contracté il peut estre reietté par le moyen de la sueur & l'ouuerture desdits porres és saisons chaudes: Et pource on peut conclure que la peste est plus contagieuse l'Eisté, & moins mortelle, & l'Hyuer elle est plus mortelle pour ceux qui en sont espris, & moins contagieuse pour le general: car l'air froid fait le bien & le mal, il fait le bien pour empescher que la contagion ne se communique pas d'un corps à l'autre si aisément, mais il tue celuy qui est frappé, pour deux raisons, la premiere pource que bouchant les porres il reuoque le venin au dedans, & la seconde il empesche la sueur, encore qu'elle vienne en vn iour crityque, & pource il faut l'Hyuer tenir la cham-

bre bien chaude ou est le malade, & l'Esté fermer toutes les fenestres qui ont leur regard ou ouuerture vers le midy, & au contraire ouurir celles qui ont leur aspect vers le septentrion, apres cela l'on pourra faire rougir des grais & jetter du vinaigre dessus, comme aussi l'on pourroit faire brulser toute sorte de bois odoriferans, *comme le Cyprès, le Geniéure, le Genest, le Sapin, le Pin, le Laurier & le Serment;* comme aussi quelque caisse ou tonneaux ausquels auroient esté des gommés aromatics ou semblable, *la Therebentine, la Rosine, la Poix,* l'on pourra prendre aussi toutes sortes d'herbes fortes & odoriferantes, *comme le Romarin, la Sauge, le Baume, la Mariolaine, le Tain, l'Ysopé, la Ruë, le Fenoüil, la Melisse, & semblable,* desquelles l'on fera brulser toute verte pour en receuoir vne fumée; l'on les peut aussi faire



boüillir avec du vin, ou vinaigre pour  
 jetter sur les grais, ainsi que nous auôs  
 dit, l'on pourra encore faire vn autre  
 parfun fort aisé, duquel la vapeur est  
 suauë, douce, & cordialle. *Il faut pren-*  
*dre de l'eau Rose & du bon vin vermeil*  
*partie esgalle pour mettre tremper dedans*  
*des escorces de Citrôs, ou d'Oranges, avec*  
*des cloux de Girofles, cela fait soit mis*  
*sur vn rehaut, & que le feu ne soit*  
*point trop grand, il resultera vne va-*  
*peur, de laquelle la maison sera embau-*  
*mées.* Il me semble que c'est assez vous  
 donner de remede que de vous ad-  
 uertir des fautes d'autrui, vous disant  
 que deuez promptement vous met-  
 tre entre les mains de ceux que vous  
 estimez estre capable, & qui ont vne  
 grande experience de ceste maladie.  
 Pourueu que vous vous fiez du tout  
 en eux; Comme dit *Guy de Chauliac,*  
*le malade guerist plustost ayant fer-*

me fiance en son Medecin, ou Chirurgien, mais il y en à beaucoup qui font le contraire, ressemblans sans comparaison, comme dit *Tagault* au second liure, chapitre II. aux chiens enragez, qu'ayant acquis l'estat de leur maladie, dictes des Grecs Hydrophobie, c'est a dire peur de l'eau, laquelle estoit leur seul & meilleur remede. Au contraire d'en approcher ils s'enfuyent, & meurent en se miserable estat: Ainsi le peuple plus il est affligé, & plus il est aveuglé, il faut croire que c'est Dieu qui nous veut punir d'avantage pour l'expiation de nos fautes. C'est ce que les anciens Romains firent vn iour apres que la Medecine auoit esté delaissee l'espace de quatre cens ans, Il survint vn expert Chirurgien à Rome nommé *Antho-nius Musa*, lequel pour guerir les membres gangrenez & pourris, vloit de

fer & de feu, comme il est vray que les plus doctes & experts Medecins & Chirurgiens ne peuuent pas tousiours obtenir ce qu'ils desirent à l'vtilité du malade, & à la volonté des assistans, aussi ce peuple conceut vne telle animosité contre ce Chirurgien, qu'ils le lapiderent au champ de Mars, & apres la necessité fut d'eux autant regretté qu'ils eurent d'enuies de le lapider. Maître *Ambroise Paré* en son 22. liure, chapitre 50. Parlant d'une grande peste qui fut à Lion, raconte bien que les habitans d'icelle ville eussent affaire de Medecins & Chirurgiens, si est-ce qu'un iour ils ne laisserent de les vouloir assommer à coups de pierres, il m'est arriué semblable chose allant de nuict en la rue saint Anthoine voir quelques malades, suivant le mandement de Monsieur Miron, alors Lieutenant Ciuil, en l'an

1606. lequel c'est acquist par sa vertu le tiltre de pere du peuple, ainsi (de M<sup>r</sup>. le Lieutenant Ciuil, l'an 1619. à fait de mesme) legitime heritier de ces vertus & dignitez au soin qu'il a eu de la police, le peuple me fit courir en ceste année plus de dâger de mourir de coups de pierre que i'en'ay eu de mourir de la peste. C'est pourquoy voyât que Dieu ayant appaisé son ire en ce temps, il fera la grace à son peuple de cognoistre & sçauoir de combien il est obligé à ceux qui pour sauuer leur vie, sacri-fient & exposent la leur : car le plus souuent en ceste maladie, le pere laisse & abandonne le fils, le fils laisse le pere, la femme le mary, le frere le frere, comme aussi le mary, la femme, & bien souuent le pere & la mere leurs enfans, En sorte comme dit *Guy de Chauliac*, au lieu cy-dessus en ceste maladie, les malades sont enseuelis sans Prebstre,

Prebſtre, le ſeruiteur quitte ſon maître, la charité eſt morte, & l'eſperance eſt abolie. Je deſirerois volontiers, mais ie ne ſçay avec quelle langue vous perſuader, & en quelle façon vous pourriez acquitter de l'obligation que vous auez enuers Monſieur le premier Preſident, comme auſſi à Meſſieurs de la Police, leſquels avec tant de ſoin & trauail ont fait eſtablir vne choſe, de laquelle la memoire eſt autant recommandable, comme la neceſſité eſtoit grande en ceſte ville de Paris.

C'eſt dequoy *Plutarque* nous parle par toutes les vies des hommes Illuſtres, des anciens Grecs & Romains, que le peuple auoit en telle recommandation ceux qui ſeruoient, maintenoient, & faiſoient quelques actes vertueux à l'vtilité de leurs Republiques, qu'après ils receuoient de grâds

honneurs & presens ; outre la bien-  
 veillance qu'ils auoient des Magi-  
 strats, & aussi de tout le peuple. Et  
 en outre à quelques vns on leur fai-  
 soit des triomphes, piramides, és tem-  
 ples, ou és places publiques, à l'en-  
 tour desquels estoiet grauez l'inscrip-  
 tio de leurs vertus, & sur la partie plus  
 eminante, leurs images, comme aussi  
 celle de quelqu'un de leurs faux dieux,  
 afin d'inciter tous les autres qui au-  
 roient charge & gouuernement en la  
 chose publique, & specialement le  
 reste de la famille de ceux qui auroiet  
 bien gouuerné de faire ( de Mesme )  
 Vous voyez donc combien vous estes  
 obligez à Messieurs de la Police, les-  
 quels ce sont volontairement chargez  
 du soin de la santé, qui n'appartient  
 qu'à eux, auxquels à la verité vous  
 estes obligez, & les deuez honnorer  
 pour le soin qu'ils ont eu à faire ob-

seruer & maintenir ce bel ordre. Puis donc que de deux maux il faut faire eslection du moindre, & entre les deux extremes garder le moyen, il sera donc permis aux riches de ce faire pancer en leurs maisons à leurs despens, si bon leur semble, & aux pauvres & commun peuple d'aller en la dite Maison de la santé. Mais quel vn & l'autre se soit promptement: car le plus souuent la peste n'a point de demain; & pource il ne faut différer & remettre à vne autre heure ce qui ce doit faire à present. Ainsi que i'ay dict cy-deuant, que ceste maladie estant precipitée, il faut de mesme precipiter les remedes, & ne se pas vouloir tousiours amuser à recognoistre les quatre temps, que nous deuons remarquer en toutes maladies, attendu qu'ès maladies contagieuses & és venins, la cause le plus souuent sur-

monte les remedes.

C'est pourquoy les temps sont precipitez & confus , ainsi il faut dès le commencement ou en quelques temps que ce soit, vn iour critique, ou non, baillez les antidotes, ou alexipharmques, c'est à dire remedes contrariant & combattant le venin, non pas selon les qualitez elementaires; Ains par vne propriété spécifique & peculiere qu'ils contiennent en eux, de laquelle l'on ne sçauroit presque tirer raison: non plus que de la maladie ie pourrois biē alleguer plusieurs authoritez sur ce passage, mais il me sufist de me targuer de la seule experiēce. Pour ce que nous ne disōs que ce qui a jà esté dit, & pour ce asseurément i'ay dit que le plus souuēt en ceste maladie aux signes plus desesperes, la nature fait des miracles, de toutes lesquelles choses i'ay desiré vous aduertir voulant vous faire participans



de ce que par experience au peril de ma vie, ie peut auoir acquis, il se pourra faire que quelques enuieux du bien general, où d'un particulier trouueront ce discours de mauuais gouft, fuiuant le dire du Poëte.

*Dieu face pleuvoir ou ne le face pas,  
Il ne contente point tous les hommes çà  
bas.*

Où bien ie diray d'eux ce que le meditant de Marcus Cato, disoit de luy.

*Ce faux rousseau Porcius au yeux pers,  
Qui harassoit & mordoit tout le monde,  
Pluto ne veut qu'il entre en ses enfers,  
Bien qu'il soit mort de peur qu'il ne luy  
gronde.*


Mais au contraire, ie les prie de m'excuser, & ce remettre deuant les yeux deux choses, la premiere que ie suis homme & par consequent sujet à faillir, ainsi qu'ils pourroient faire, & la seconde ie veux monst

que ie desire apprendre d'eux, apres  
ils participeront au bien que mon ser-  
vice pourra apporter au public.

Peuple Parisien n'ayez donc es-  
gard à ses contentieux, & receuez ce  
que la bonne volonté d'un homme  
libre vous tesmoigne; ce faisant vous  
m'obligerez à faire mieux, & à prier  
Dieu qu'il veille appaiser son ire & la  
destourner loin de vous & de vostre  
ville.

*Mon P O T E L tu chante merueille,  
Parlant de la contagion,  
Si l'on te veut prester l'oreille,  
L'on esuitera bien ce poison.*

I. HERISSON.



L'IMPRIMEUR,

*Au Lecteur.*

SONNET.

**P**OTEL par mon moyen & par mon industrie,  
 Fait voir au iour l'effet de son rare sçavoir,  
 D'un remede excellent, qui sur tous à pouuoir,  
 De preuenir vn mal qui nous haste la vie.

Son liure ayant passé par mon Imprimerie,  
 Ce diuulgue par tout, & aux hommes fait voir,  
 Comme on se peut garder, & cheZ soy receuoir,  
 Ce venin à pesté & dompter sa furie.

L'on ne doit desdaigner ce labeur tant exquis,  
 Labeur qui n'a loyer qui ne luy soit acquis,  
 Et toutefois (LECTEUR) de soy ie ne demande,  
 Sinon que le lisant, te souuienne de luy,  
 Et puis après de moy comme vn second appuy,  
 Qui en amy ta fait vne faueur si grande.

N. C.

*Extraict du Priuilege, & Permission.*

**P**AR grace & Priuilege du Roy, a esté permis à  
 M. Guillaume Potel, Maistre Barbier & Chi-  
 rurgien Iuré à Paris, de faire Imprimer, vendre &  
 distribuer par tel Imprimeur ou Libraire que le-

dit Potel trouuera bon estre. *Un Discours des maladies Contagieuses aduenues en ceste ville de Paris, ex années 1596. & 597. & és années 1606. & 607. comme aussi en l'année 1619.* Lequel Priuilege est pour six années, portant deffences à tous autres Imprimeurs & Libraires de ce Royaume, d'imprimer ledit liure ne faire imprimer ne vendre ne distribuer à peine de six cens liures d'amende arbitraire, le tout donné aux pauvres, ainsi qu'il est porté par ledit Priuilege. Donné à Paris le 4. iour de May 1623.

*Et ledit Potel à permis & permet, cédé & transporté sondit Priuilege & permissiõ à Nicolas Callement, Imprimeur pour le faire imprimer vendre & distribuer ledit Discours sus-nommé, tant que bon luy semblera & en faire son profit durant le temps & espace de six ans, & non à autre sur les peines portées, ainsi que dict est. Fait le premier iour de Juin, 1623.*

Signé,

G. POTEL,

*Fautes & uenues en l'Impression.*

Page 12. lig. 6. de son *Aphorisme*, lisez de ses *Aphorismes*, pag. 25. l. 3. lisez la republique, au lieu de la republique, pag. 26. lig. premiere lisez de cét abisme, pag. 26. lig. 16. lisez bien en passant, au lieu en bien passant, pag. 36. lig. 4. lisez Polimurus au lieu de Polimura, pag. 37. li. 20. lisez incorigibles au lieu incombibles, p. 48. li. 14. lisez general au lieu d'agreables, pag. 84. l. 4. lisez ie ne sçay au lieu de ie sçay, pag. 95. lig. 13. lisez ne se peut au lieu ne se point, pag. 100. lig. 10. lisez bien que cela.

F I N.